

四庫全書薈要·乾隆御覽本

集部

御定歷代賦彙卷五十

典禮

太常賦

有序

元

徐容

周禮司常掌九旗日月為常交龍為旂鳥隼為旗熊虎
為旗龜蛇為旒通帛為旛雜帛為物全羽為旒析羽為
旌其降殺與五路五冕同而其用各異故惟天子得建
太常以祀天而臣子之有功者亦可書名於其上愚觀

周禮建太常之說有以見聖人謹嚴之至及觀太常紀
功之意又有以見聖人崇報之情是用表而出之以為
賦其詞曰

溘吾遊此春宮兮近天表之清光觀嚴薄之新儀兮揭
日月而齊明雲容容以下垂兮風冉冉而上和樹以素
錦之所綢兮截屹立乎長杠仰翬羽其若飛兮五采注
乎旋頭貫縵上之蜿蜒兮十有二乎綴旒交龍光之上
下兮爛昭昭其未收載兩曜以行空兮天之明兮九幽

維皇明之象天兮駕郊天之玉輅影搖搖於扶桑兮翼
六龍之飛馭恍上帝之照臨兮即予心之披霧苟予心
之未然兮直悵悵之烏兔亦何有於裨聰兮體無私之
容光茲先王之制象兮羌表鑒乎太常豈止為旌殊勲
之具兮示臣子之奉揚故大赤不得以比尊兮太白偃
乎其在傍矧木輅之大麾兮又惡得而抗行故纘戎不
得以褻之兮穆將愉兮上皇竊獨悲夫制之不古兮續
蜺旌與虎旂曳明月之神珠兮歆金景之紫旃羌徒侈

乎觀美兮捲蔽空之雲烟羸胡為兮匪郊兮壯東遊之
山川漢又用之求神兮且逮事乎甘泉矧麾幢之過節
兮又太侈於開元嗟太常之匪常兮用已失其度也增
五輅於十二兮紛不知其數也幸太常之復周兮輅乘
殷之制也孰不欣欣而相告兮願見羽旄之美也遂作
頌曰太常象明君之聰兮太常紀績臣之忠兮穆穆一
堂代天工兮保合太和時之雍兮彼美園丘在國之陽
兮交龍旒旒動日光兮天鑒在邇亦孔彰兮相德紀功

同其長兮微臣作頌敬獻司常兮

太常賦

元

何槐孫

圓丘歲祀方澤薦馨華仗列星嚴蹕震霆先輅鳴鑿以
夙動翠華移景而載臨樹旌麾之婀娜擁干矛之晶瑩
絢爛乎通達摩盪乎員靈肅萬乘之威儀聳四方之觀
聽則有盛制是曰太常揭崇竿之巍巍曳垂旒之央央
長綵炳耀乎朱霞綢錦繽紛乎素霜皓魄塗澤乎圓月
赤精繪綴乎太陽三五之日東西之方騰晶輝以互射

發瑞彩而相望不虧不昃儼亭亭於幅帛並明並昱恍
瞳瞳乎穹蒼樹羽飄飄以起舞繪龍天矯而交驥聯幅
之廣植材之良輪囷數圍之壯偃蹇百尺之長虎賁雜
沓以擁立欻飛奮迅而高張雨師蕩乎纖氛風伯清乎
康莊八神挾竿以踊躍雙鳳翼駕而翱翔窈窕旖旎翕
忽悠揚影盪大地光浮周行駢然而陰炳然而陽容與
乎大輅之間竦卓立之昂昂轆轤乎太清之表杳無依
之洋洋若乃華冕穆穆法衣皇皇重瞳屢回淵衷孔彰

載審厥象載瞻其光體大明之下照廓至聰之無旁洞
燭萬里丕冒八荒靡遐靡邇孰蓋孰藏且夫錫鑿之音
所以宣其心氣之中和繆苻之美所以昭其制作之文
章是則太常之建非特以眩耀乎衆觀蓋將以裨益乎
聖皇是猶取山鎮以琢圭璧法乾坤而作衣裳若乃元
老宗工崇勲偉蹟乃股乃肱維柱維石功洋洋以如在
名揭揭而中立庶瞻覽之不忘示眷顧之無斁彼有圖
形於麒麟流芳於竹帛未若太常永在王室有美志士

觀光上國幸望屬車之塵願備從臣之列共奔走於左
右覲威顏於咫尺稽周官之遺典參天朝之成式具鹵
簿之來儀表太常之殊飾庶幾千載之下仰皇猷於今
日

太常賦

元
劉文德

維聖神之智創心化工之範模河呈圖而畫卦風飛蓬
而成車仰天文而覽觀爛雲氣之卷舒攄精神於制作
為旂常之權輿肇蒼姬之繼統備儀物而誕敷五路駢

羅九旂散殊或異以色或分以圖繫太常之所建與玉
輅之同驅分三章於帝服揭二曜於乾樞合璧凝暈重
明應符恍廣寒之玉兔映扶桑之陽鳥飛龍上下而盤
結綴旒晻藹而扶踈羽凝采兮陸離錦成文兮縈紆掌
之以司常之職建之於南郊之墟想其清蹕戒道和鸞
載途影拂瑤蓋彩聯玉裾園壇夜冷疑蜃氣之騰海黃
道塵清眩虹光之凌虛列星照兮婀娜清颯舞兮吹噓
上昭天象之同明旁挾神物而為徒乃有勳冠當世恩

流八區阜夔稷契之事業伊傅周召之訂謨齊景鐘而
並銘倅汗簡而列書等山川之帶礪異麒麟之形摹示
褒揚於不朽豈徒偉竒觀於斯須彼龜蛇為旒鳥隼為
旗晉旆示威齊旌昭虞猶薰蕕猶與穹壤曾何足以擬議
而比論之歟慨古制之雖遠撫流芳其若初思獨埽於
筆陣拔先登之螭弧際明良而策勳夫予心而弗渝

黃目樽賦

以禮尚治情酌
中形外為韻

唐
李程

彝器之美黃目是尚黃者取黃理而中乎目者象清明

而外暢徵戴禮而有謂懿周人之是創將表敬於宗祧
必薦馨於鬱鬯爰設嘉名是用飾情彼因外而有制猶
自中而立誠酌於心終有假於圭瓚象乎目難取比於
兕觥必因樽彝爰佐齊醞以明大享之品物以助諸侯
之孝悌故以目而為名因酒而成禮爾其克脩祀典遐
本淳風將杯飲而體異等犧樽而義同殷薦有恒守籩
豆之列備用何所在宗廟之中追述作之深旨諒昭明
而有融用當其無物不為薄齊納金而飲酎等用茅以

明酌挹而未竭故不慚於金罍執而不揮寧有愧於玉爵立制有經創意圖形潔以新樽冀精誠之可達歆於明德知黍稷之非馨其象也則小取喻也斯大雖斟酌在中必儀形於外嘉其不泛不濫可繼可傳罔施丹雘徒假雕鐫詎同乎卮信乎美而無當豈比乎斗則有象而在天徒虛無以為說非潔芳以告虔甚矣哉前王之創物俾後代之相沿

黃目樽賦

以清廟之器所以禮神為韻

唐

裴度

聖人之制祭也因物達情比象配類盡內心之享禮定
黃目之彝器居樽之上察神之至黃其色保純固於中
央目以名洞清明於幽邃將以贊禘祫報天地成形而
百代猶傳徧祭而萬靈具醉懿夫周禮盡在殷薦孔明
鬱鬯馨而外達湛醪華而內清濩落為用昭彰表誠自
可配於龍杓焉取儔於兕觥當其霜露盛時金石奏廟
告虔之始在物居要動明酌而曼醪騰光澄舊汙而圓
規納照且禮經所紀象設有以首瑚璉之序助宗廟之

美體含弘足擎蹠從祝之獻而如鼎之時精氣散於外
飾黃潤豔於通理嚴敬而挹且見夫爵盈明德之歆詎
聞乎罍恥若乃籩豆並置陶匏共陳亦可以備觀光之
祭法攄素懷於蜡賓酌其中諒明明之取義華其晬將
屬屬以交神至如夜燎之時宿設之所含霜若麗夫金
質導氣更宜夫桂醕自合禮於宗彝匪齊名於杜舉是
知純嘏將降明禋在茲達臭陰於勿勿駐靈駕之惻惻
尚禮然也明王用之方今樂和同禮無體案盛式務鬱

器光啓客有習於聲詩願奉樽而觀禮

象樽賦

以觀器禮
肅為韻

唐
闕名

稽太古之至薦也以汙樽杯飲除地而為壇迄後聖之
禮禮也其籩豆犧象咸飾其碧丹是以五禮秩經於宗
伯六樽詔典於春官實有嚴而有翼豈無取於異端故
殷王有彤日之祭魯聖有禘月之觀且皇周之享也肇
繪象於茲器既普淖於式潔乃登堂而莫次耀如金石
以率舞派若洪瀛而顛負騰圭瓚以沃暢達羣神於玄

秘敬宗宜社以交其幽明返本歸仁以尊其天地可以
等上下之列可以參陰陽之位豈齊夫斗筭之外役寧
假乎挈餅之凡智憤季氏之將旅恥王孫之寧媚況今
交節以義具物昭洗介茲壽考以洽百禮柔嘉滌濯以
脩其虔恭登降揮觶以流其愷悌夫禮以器成器以禮
肅擬冰壺之潔徹鑒膳鼎之覆餗望堯衢而感惠賴嘉
時而有淑既無列野之郊願致誠於工祝

拒鬯賦

元
楊維禎

曰若稽古烈山氏兮農用天下百穀利兮彼美靈苗非
蘼芑兮一稔二米獨異秭兮聖人有貴取為釀兮和以
鬱金澆醖盍兮汁獻出香芬其暢兮臭以達陰壑實尚
兮酌彼黃流輝玉瓚兮社壇崇門壘瓢展兮凡裸凡醜
有概散兮或嚴大肆共其溷兮掌以鬯人美潔誠兮孚
於上下通三靈兮思昔公旦自有命兮詞曰明禋禮何
盛兮召公維翰繼受釐兮文侯捍艱亦受賚兮晉侯再
拜敢忘君之賜兮彼魏公九錫何休命之悖兮吁嗟柅

聖生世世分薦德報功我思古之制兮

太羹賦

以宗本誠敬遺
味由禮為韻

唐
施肩吾

至敬尚潔在禮惟恭饗異四時大饗以先王為裕羹重
五味太羹以無味為宗薦既殊於禘祫禮乃變乎秋冬
則知此祭不數此羹不混法明水以成功惡鹹醎而是
損義由反古類豪結之無文道尚全真喻恬淡而為本
故宜輕八簋黜三牲其味唯德其色唯清若謂我在物
則物不在於鹽菜若謂我在水則水不在於行行小周

人之尚臭哂殷家之貴聲雖無形而可挾務展禮而由
誠觀乎一鼎無包百王是慶法君長以為尊事鬼神而
聽命既陳既酌彌重乎精誠不絮不調莫先乎聖敬聿
脩前典不可度思因七獻以成禮約三歲而為期饗燕
既終於勿勿禮容方盛乎遲遲且在有名而可重孰云
無味而見遺是以不饗甘苦不由饗餼清雖假於一烹
用不因乎多味澄渟在潔惡薑桂以為滋肸蠁降靈歆
明德以為氣是以禮因羹而克舉羹因禮而允脩乍同

西伯之禴寧比東鄰之牛一以表專一而不二一以表
通微而闡幽豈徒不和而為貴亦以明反本之所由懿
夫其名類餼其正在禮下以敘人倫上以親祖禰苟傾
覆之無虞諒威儀之由體者也

明水賦

以冷然感化潔
我蒸嘗為韻

唐
崔損

大饗之禮明水攸先其水也所以本太古之淳樸其明
也所以享至敬之昭宣從朗月之潛化應陰燧而通玄
暗度晴空泛銀河而色靜曉臨清廟浮玉露而光鮮既

潤下以功博亦就濕而義全冥兆朕於至理契幽微於
自然加五齊而致獻首三酒而告虔觀其象在乎天德
包乎坎類影響之相名協陰陽之應感其禮斯節其色
斯潔不假縮於苞茅復何施於麴蘖將汗樽而並用與
越席而齊列或異乎勿幕有孚豈比夫不食而潔皜皜
熒熒清清泠泠明德為馨神人是聽從無味而有味自
無形而有形深源莫測實資造化濯桂影於遙天洗蟾
光於永夜懿夫昭潔著贊溉賞常蒸宜玉笋之見貯匪

金盤之見承若乃鼎俎備設嘉羞衆夥必必芬芬名之
莫可尚其本也知享獻而靡他貴其新也諒斟酌而在
我於維巨唐穆穆皇皇宗初祀異蒸嘗玄酒乃薦至誠
允臧天降其福地出則祥醴泉洋洋明水是將徹慶雲
之色映瑞日之光羣臣作頌歌孝治之無疆

明水賦

以玄化無宰至
精感通為韻

唐
夏
稜

祭祀上潔精誠克宣伊明水之為用諒至誠以為先積
陰以成符嘉應於冥數以鑑而取感無私於上玄將假

以表敬式彰乎告虔皎皎泛月灩灩降天既稟氣在陰
亦成形於夜有無雖繫於恍惚融結寧隨於冬夏明者
誠也我則暗然而彰水惟信焉吾非倏爾而化徒觀其
清霄霧斂朗月輪孤鑒清瑩而類鏡水滴瀝而疑珠混
金波而共潔迷玉露而全無感而遂通配陽燧之為火
融而不涸異寒冰之在壺彼既無情此何有待始同方
而合體寧望遠而功倍故能佐因心於霜露均潤下於
江海有形有實徒加以強名無臭無聲孰知其真宰是

以昭其儉潔其意含水月之淳粹脩案盛於豐備作玄
酒而禮崇登清廟之誠貴嗤潢汙之野薦陋甘醴之莫
致祀事孔明其儀既精無朕而有不為而成二氣相臨
本自蟾蜍之魄三危莫比殊非沆瀣之英至道自玄而
兆醴泉因地而生原夫月麗於天水習乎坎物有時而
出故方諸而夜呈事有朕而因故陰靈而下感大滿若
冲其來不窮風塵莫染其真質天地不隔其幽通况國
家崇儀禘祀薦敬旻穹方欲行古道稽淳風客有賦明

水之事敢聞之於閔宮

明水賦

以玄化無宰至
精感通為韻

唐

歐陽詹

智之不測有明水焉方諸在手圓月居天象質遐分則
迢遙而迴遠精華潛合遂滴瀝以留連可謂妙自斯妙
玄之又玄茲道也自何而來彼至也從何而借越杳杳
之蒼昊滋遙遙之永夜望蟾魄而光彩殊流端蛤形而
清冷忽下等陽燧之通感實柔祗之閔化豈非月包陰
德蛤乃陰餘英精合契氣類相符共稟坤而配坎諒交

律以有濡是理焉自取之乎必有斯水也遂生之於本
無精潔可嘉清明斯在湛玉壺以無垢入犧樽而有待
處要實爵今則由於毫人置下升堂以不聞乎真宰觀
其所自原夫所致臨庭目擊雖從陰鑒而來向月心祈
允似上天而至來莫我繫至莫我精棄本不仁故存名
而曰水從儀酌號遂表性以稱明信可薦宗祏祈上清
是故祭先展敬類帝昭誠首三酒而上獻掩五齊以先
行招百神之景福致萬姓之元禎無益於人鄙玉漿於

夜漏自求其溢晒珠露於金莖遊原習坎固有旁感處
陸騰空不無玄通龍吟雲而致雨虎嘯谷以來風動無
千里之燠潤纔百里之功豈若以握中之瑣細映天上
之腫朦精液下融神人以崇而福祿攸同者乎

明水賦

以玄化無宰至
精感通為韻

唐韓愈

古聖人之制祭祀必主忠敬崇吉蠲不責其豐乃或薦
之以水不可以瀆斯用致之於天其事信美其義惟玄
月實水精故水其本也明為君德因取以名焉於是命

烜氏候清夜或將祭圓丘於玄冬或將祭方澤於朱夏
持鑿而精氣旁射照月而陰靈潛下視之不見謂合道
於希夷挹之則盈方同功於造化應於有生於無形象
未分徒逞離婁之目光華暗至如還合浦之珠既齊高
於醴酒詎比賤於潢汙明德惟馨神功不宰於以表誠
潔於以誠荒怠苟失其道殺牛之祭何為如得其情明
水之薦斯在不引而自致不行而善至雖辭麴蘖之名
實處搏罍之器降於圓魄殊匪金莖之露出自方諸已

似鯀人之淚將以贊於陰德配夫陽燧夜寂天清煙消
氣明桂華吐耀兔影流精聊設教以取水伊不注而能
盈霏然有象的爾而呈始茫茫以霜積漸微微而浪生
豈不以德叶於坎有類則感形昭在空氣應則通鶴鳴
在陰之論不謬虎嘯於谷之道可崇庶令知聖真之無
黨驗天地之至公竊比大羹之貴味幸希薦於廟中

明水賦

以玄化無宰至
精感通為韻

唐
陳羽

彼美明水含精自天孤影流輝乃凝空作潤萬靈來享

故為酒稱玄所以貴新滌慮殷薦告虔水本涵清表至
深之心著明以比德惟馨香之義全想夫含氣遙空成
形永夜出陰鑒則凝清自美對明燭則搖光相借至誠
所感同就濕而流大饗是資若待神而化斯可謂至精
無朕明誠有孚泛清月而乍融乍結洗輕煙而若有若
無潤而鮮見湛露之濡金鏡晶兮潔類清冰之在玉壺
至若高天委秋皎月分彩氤氳既合精粹斯在方昭德
以降神異趨下而歸海是知嚴而敬者其德大潔而祀

者其福倍繁景命之不渝豈成功之不宰原夫明水之
初化也天子齋心司烜歲事望靈月露陰燧皎晶浮光
清泠在器自無而有知靈化之不測應感而來知神物
之斯至其或崇國祀設方明備禮樂潔染盛用陶匏之
器薦爾粟之牲秩神祇而配坐望天地之含精匪明水
而神不降無明水則祀不誠是以明處作離水居為坎
諒明水之潛化本陰陽之所感其名也合五行之德其
用也冠三酒之功泊爾味淡凝然色融至馨無臭至潔

含光則是水也與靈物幽通

明水賦

以玄化無宰至
精感通為韻

唐

闕

名

明水之設其義斯玄水以潔著明由色宣神靈是享祀
典攸傳籙豆靜嘉取其灌溉麴蘗不用存乎吉蠲審靈
變之無方實太陰之相借月當盤而冥召水承月而潛
化冲融其色連桂影於晴空泛灩其光映銀河於永夜
理包幽奧質本虛無在洞徹而彌朗介清明而不汙冠
澄酒之奠禮其式序方行潦之酌亦實有殊懿夫淨透

霄光遠浮星彩取之不竭從而不改彰至敬而用協神
心兆無形而道符真宰信體微而義博知事簡而功倍
當其配饗宗祧告成天地壇壝廣設粢盛大備爰命司
烜聿持陰燧月晃朗而遐臨水滌潛而潛至既清既潔
表勤昭事之心克誠克明載展奉先之意原夫物以類
聚應因感生水惟坎德月實陰精所謂聲同即應氣合
乃并行之斯行且比夫流而不滯止之斯止亦似乎滿
而不盈徒觀夫皓魄淒清湛然澄澹出於朕兆形乎有

感國家蒸嘗是奉享獻惟崇明水載挹至誠遂通始分
素魄之下俄傳清廟之中應召而生寧假挈餅之智順
時而委豈煩汲井之功固將降肸蠃於純嘏表虔恭於
聖衷者哉

陽燧賦

元 史駟孫

嚴邦家之祀事稽禮文於故典匪精誠之潔著辭能無
乎不忝犧牲牲牢卜具三月之滌酒醴粢盛躬藉千畝
之甸水陸取四時之和籩豆備物產之遠蕭茅明潔而

致玉帛誠敬以展雖雖肅肅以顯相濟濟蹒蹒而陳饌
膳盡禮與盡物宜神明之可交惟聖人之示法俱內心
之靡昭曰盛德而體物豈貴多之可報必也推陰陽而
致類求絜氣以明燭仰離明之麗天蓄陽火以發育庶
可取以設燎敷神光之煒煜乃運獨智命工制器其器
伊何寔曰夫燧諒范金之形似效規燬之象義匪四時
之鑽改爇樵薪以供饋司烜命氏職掌迺專吉卜既戒
曷敢弗虔候若木之揚輝攬義馭以行天屏翳深遁而

雲斂沆瀣澄沫而景鮮乾端坤倪俯仰呈豁神司靈守
拱揖後先於是展襲出燧瞻對虛碧天陽一加晃蕩洞
射回旋交映炫轉的皜縷祥煙之氤氲歛朱光之赫奕
敢誇妙於人巧寵靈貺之天錫配方諸之明水符造化
而為匹然後敬以將之饌陳是照燭蕭合馨燔牲同燎
若乃圓丘展事長宵未曙列宿俯垂而收芒長河避影
以韜素覽陶匏蒲秸之陳粲然在目又何數乎田燭之
載路至於宗祀大饗逮闇夙興鼎彝駢列俎豆紛紜執

事有恪百辟降登無微不著靡幽不明煌煌晰晰自堂
徂庭祀事孔昭大禮用成斯聖人因天事天之一事而
著厥誠者也雖然器有其義感有其理胡金鑑之一規
致離明之交濟蓋以五行之運本乎二氣或取資於相
生或洩過於相制故金木皆能致火而祀事則以得之
天陽為貴耳厥今泰定治成禮樂斯興惇誨故老究覈
研精一物不備雖微必徵矧郊祀之所需寧舍之而弗
明賦陽燧以呻嗶愧書生之乏能陪甘泉而頌封禪固

將屬筆於子雲長卿者乎

陽燧賦

元

馮翼翁

伊大塊之播物妙塊北於洪爐渺二氣之充塞兆五行之感乎坎離互而成體水火激而相須倘積油之有徵亦焚槐之非誣羌東風之扇物散仁氣於柳榆彼鬱鬱之何有乃炎炎之一初布束緼於代序易茹飲而粒蔬信物理之有待感燧人之權輿維司烜之有職述創巧於智餘廣昭晰於明裡陋尋常之布除仰大明之昭揭

實至陽之精儲湧金鉦之瞳瞳納外明於內虛煉金錫
之溶漾較分劑於錙銖潔治舍以熏沐達巧思而躊躇
掇和璧於內範鏤蟠螭於外模匪波光之凸起異奩照
之平鋪瑩磨淬於中容鑑纖塵之有無映虛勾於斗室
亘紅光之發舒試流曜於當空跌倒景之陽烏日規亭
亭而下照爛沈淵之赤珠晃洞射以交貫忍凝睇於須
臾手執熱而誰濯指傳新而孰噓致潔氣於高煙散明
燭於齋廬煥鼎俎之陳列朗籩豆之孔殊光陸離於豐

盛影蕩漾乎清醕散餘彩於庭燎竊聲鏘兮夜何如龍
旂舒而欲煖恍初日之當隅神續續而來御靈剡剡而
與俱彼太一之容與愧仙藜之自扶豈燭火之足矜實
離明之繼敷即一事之明潔知百禮之勤劬即一誠之
感召來萬福之報腴宜分職之微賤列聖人之禮書倘
推類以盡物驗陰陽之理符彼溫濕之異就實同氣而
相於仰明明之如月想露滴於秋螭攀桂花而雲征孰
與揭鑑於當途昔賢之賦明水抑虎變而龍杼欣援筆

而浩蕩願沐穎乎方諸

陽燧賦

元

吳朝陽

繫人文之未宣隱大朴之淳質爰燔黍而捍豚亦未知
夫火食迨往聖之迭興益有光於前昔迺制物以利用
昉教民之炮炙或鑽木於四時或擊頑於山石是皆創
制之人為而未知造化感通之極也若夫日為衆陽之
宗火稟純陽之德象離麗之中虛配乾行而不息煜萬
物而炳靈烜庶彙而生色淪精則畢照於幽隱揚彩則

發揮於動植雖窮示之漠然而潛通之有術乃氣類之
相感非臆見之所能測方其祀事將嚴宿燎斯設濟濟
在庭穆穆布列欲眩晃於饌陳致昭然之明潔乃命烜
氏出火鑑迎初陽之既升挹餘光之清湛爾其六龍飛
馭以正駕踐烏振羽而高翔既分曜於若英亦洗華於
扶桑凌中天之倒影粲下土之長芒金燧斯暎祥煙有
輝泐然符合之妙冥然感應之機非木生之兆朕乃陽
燾之熹微異託物之騰燄蓋流光之凝輝也於是對越

駿奔肅雍顯相儼煌煌而在旁仰赫赫之臨上堂陞以
之而昭晰衣冠以之而宣朗臣民以之而雍熙天地以
之而淳塗與明水而並陳驗陰陽之嘉貺將信祝而合
祛若宴好於肸鬻且其為用也非世俗技巧之工乃今
古法度之器合天人之至和並璋瓚之上瑞雖用舍之
有常亦待時之斯致豈暗室以中藏寔明廷之弘義矧
熙洽之治朝德無遠而不被秩羣文以迓衡歲升中之
裡事庶圖牒之洽聞將符貺之委致掄微材以效竒斯

殷薦之大備尚希實於宗廟庶不遺於遐棄賦已又從而輯之曰大明麗天貞萬國兮聖人出治爰取則兮朝事聿嚴羣率職兮有器於此傳古昔兮命曰陽燧取火於日兮用致明潔饌陳孔飾兮昭明有融上下降陟兮純嘏億萬年永垂式兮

菁茅賦

明

王儒真

草木之生於天地間者概乎其類或有繁葉而踈枝亦有深根而固蒂飽沾雨露之恩足感陰陽之氣叢本則

殊榮枯有序是以薰蕕之不同因其品名之各異惟茲
包茅生而異類一莖三脊拔乎其萃曰芬曰芳為祥為
瑞著乎禹貢之辭產乎沅江之地春祠秋嘗備供王祭
於是朝廷所用有司加意督工栽種培植盡誠春則長
養禁護慇懃夏則採拔沆曝輕精虔恪包匭驛傳遞程
衆官拜送是用進呈貢以宗祀之用及沾鬱鬯之榮裸
假縮酒薦享克誠於戲此茅之為美也其質甚輕故用
之為祭也其禮至重蓋繫辭既有白茅之藉用春秋復

責包茅之不貢聖人巨筆猶車輪之曳踵嗟夫聖人制
禮先王身修歷代未泯萬世傳流作古今之儀範繼天
地之皇猷承流宣化與國咸休予是思之豈不竦踊述
其由泚筆記其功用以風其意彰以諗其衆勿翦勿伐
宜哉宜種冀其於萬斯年不失沅江之底貢

庭燎賦

以早設王庭輝
映羣辟為韻

唐

王起

王者崇北辰之位正南面之威赫朱燎以具舉列彤庭
而有輝助彼皇明可燭於夜色叶茲睿哲引曜於宵衣

信乎令典有作舊章不違當其冠劍鏗環珮昭晰
我爭赴肅肅就列聽玉漏而未央仰紫宸而初
爇珠旒將出方熠熠以星懸綵仗徐來已煌煌而
電設九儀稍布六樂爰分代晨光之昭曜雜佳氣
之綢緼騰輝於駕鷲之行若離若合委照於熊羆
之旅或友或羣昭昭彰彰紫氣紅光聲明煜燁百
物熒煌覩炎上之有赫知臨下之無荒遠而瞻之
謂焚裘之煙昭儉於晉帝迫而察之似流屋之火
呈瑞於周王金釭莫齊銀燭非競長風

乍拂高燄彌盛華袞燦爛以相鮮猛虞攫擊而交映其
容烈烈其明杲杲附寒者覺其春深假寐者疑其曙早
則知統四海朝百辟勵夙興勤夕惕佐盛儀而有待惜
流光而無斁昭其明也叶天鑒之清穆望而畏之契天
威之咫尺彼燿火秦舉神光漢覲何足示來儀之容呈
入覲之績則知我皇立人之程為國之經旂泮泮而咸
造鷹鏘鏘而可聆萬宇人多士寧豈徒美君子之至在
宣王之庭

庭燎賦

以天覆之廣文
德以來為韻

唐

楊

濤

王者親政以虔遲明於未明之前佇來朝於昧爽爰設
燎以光宣爛然見舉赫以相鮮燧人載馳俾流光而燭
地羣后咸造將辨物以朝天時也四照方陽千官是候
星尚泛於銀漢夜未窮於玉漏烘廣庭之際施以朱陽
曜紫微之傍皎如白晝伊有爛之通照契無私之光覆
於是逮其時灼其姿影搖丹檻光動彤墀凌霜氣而炎
威轉熾拂輕飈而委燼潛遺設必有因蓋欲司其明也

幽無不察豈假望而畏之事光乎國典詠美乎周詩如

是則稱蘭膏者自滅影於是夜言金釭者敢呈暉於此

時豈設王庭其照能廣既烈烈之傍達亦勤勤於睿想

尚早斯至激環珮以鏘洋居高匪遑燭宮闈而曠朗功

殊甸燎事美蘭薰焚五夜而幽明已辨輝九重而鸞鷲

斯分小投炬以流景嗤衡璧之呈文息其燄而恒讓朝

日浮其煙而乍雜瑞雲有以啟天顏輝至德燐亂炳煥

熒煌翕絕連珠戶而散彩映丹桂而混色懿夫勲烈有

融用舍合理當其晦可燔爇以生讓其明可撲滅而止
原燎縱而奚匹燿火通而何以未若茲燎之舉天庭之
隈可使九門洞啓諸侯畢來

御定歷代賦彙卷五十

謹案卷四十九第四頁前八行天宗必降按文苑
英華注天一作六

第十八頁前六行鬱曾宮之律萃按杜甫集曾作
閱

第十八頁後六行孔蓋歌以颯纚按杜甫集孔作
芝

卷五十第三頁後五行窈窕旖旎刊本旖訛旖今
改

第十四頁前八行故水其本也按昌黎集水作求
第十五頁前二行聊設教以取水按昌黎集教作

鑒





總校官庶吉士臣張能照

校對官編修臣周厚轅

校對官編修臣楊壽楠

謄錄監生臣李維翰

謄錄監生臣邵士洙

欽定四庫全書薈要

集部

御定歷代賦彙卷五十一



御定歷代賦彙卷五十一

典禮

晉
潘岳

藉田賦

魏
晉
之四年正月丁未皇帝親率羣后藉於千畝之甸

禮也於是乃使甸師清畿野廬埽路封人壇宮掌舍設
栒青壇蔚其嶽立兮翠幕黝以雲布結崇基之靈址子
啓四塗之廣阡沃野墳腴膏壤平砥清洛濁渠引流激

水遐亘繩直邁陌如矢蔥僖服於縹輓兮紺轅綴於黛
帑儼儲駕於廛左兮俟萬乘之躬履百僚先置位以職
分自上下下具惟命臣襲春服之萋萋兮接游車之鱗
鱗微風生於輕幘子織埃起於朱輪森奉璋以階列兮
望皇軒而肅震若湛露之晞朝陽兮衆星之拱北辰也
於是前驅魚麗屬車鱗萃闔闔洞啓參塗方駟常伯陪
乘太僕秉轡后妃獻種稔之種司農撰播殖之器挈壺
掌升降之節宮正設門閭之蹕天子乃御玉輦蔭華蓋

衝牙錚鎗綃紉絳縹金根照耀以炯晃兮龍驤騰驤而
沛艾表朱玄於離坎飛青縞於震兌中黃煜以發暉兮
方綵紛其繁會五輅鳴鑿九旗揚旆瓊釵入蕊雲罕晻
藹簫管朝晰以啾嘈兮鼓鞞砮隱以砰礚筓簋疑以軒
翥兮洪鐘越乎區外震震填填塵鷲連天以幸乎藉田
蟬冕頰以灼灼兮碧色肅其芊芊似夜光之剖荆璞兮
若茂松之依山巔也於是我皇乃降靈壇撫御耦坻場
染屨洪縻在手三推而舍庶人終畝貴賤以班或五或

九於斯時也居靡都鄙民無華裔長幼雜還以交集士
女頌禘而咸戾被褐振裾垂髻總髻躡踵側肩倚裳連
袂黃塵為之四合兮陽光為之潛翳動容發音而觀者
莫不抃舞乎康衢謳吟乎聖世情欣樂乎昏作兮慮盡
力乎樹藝靡誰督而常勤兮莫之課而自勵躬先勞以
悅使予豈嚴刑而猛制裁有邑老田父或進而稱曰蓋
損益隨時理有常然高以下為基民以食為天正其末
者端其本善其後者慎其先夫九土之宜弗任四人之

務不壹野有菜蔬之色朝靡代耕之秩無儲蓄以虞災
徒望歲以自必三季之衰皆此物也今聖上昧旦丕顯
夕惕若慄圖匱於豐防儉於逸欽哉欽哉惟穀之恤展
三時之弘務致倉廩於盈溢固堯湯之用心而存救之
要術也若乃廟祧有事祝宗諏日簠簋普淖則此之自
實縮鬯蕭茅又於是乎出黍稷馨香旨酒嘉粟宜其民
和年登而神降之吉也古人有言曰聖人之德無以加
於孝乎夫孝者天地之性人之所由靈也昔者明王以

孝理天下其或繼之者鮮哉希矣逮我皇晉實光斯道
儀刑乎於萬國愛敬盡於祖考故躬稼以供粢盛所以
致孝也勤穡以足百姓所以固本也能本而孝盛德大
業至矣哉此一役也而二美具焉不亦遠乎不亦重乎
敢作頌曰思樂甸畿薄采其茅大君戾止言藉其農其
農三推萬方以祗耨我公田實及我私我簋斯盛我簋
斯粢我倉如陵我庾如坻念茲在茲永言孝思民力普
存祝更正辭神祇攸歆逸豫無期一人有慶兆民賴之

藉田賦

唐闕名

帝王之德無以加於孝乎惟孝之理惟農是先我上皇
傳璽之二載聖主飛龍之四年日在陬訾祇事於九宮
之位時惟戊巳躬耕於千畝之田祥風發於耒耜瑞雪
掩於郊鄗萬姓顚顚若百川之朝海九宮濟濟如衆星
之麗天帝乃儼然蔭華盖被袞服戴冕旒佩瓊玉朱紘
炯以照燭藻絳紛其繁縟敬齊之色既肅肅以雍雍禮
樂之容亦皇皇而穆穆於是出甲乙之帳命先農之官

設庭燎而晰晰陳量幣而彋彋旌旄夾於翠幕寔簋列於青壇然後華鐘撞焚燎舉馨香發乎聖躬烟煜感乎寰宇常伯撰播殖之器宗人掌牲帛之數既金石而間陳亦籩豆而靜旅晨光漸朗湛露初晞告九天之事畢將三辰之禮依帝猶懷神農之務稽想伯禹之疆理一日於是躬耕二之日於是舉趾秉金耜而顯若駕鐵驪而禮矣將致美於粢盛遂盡力於耘耔望農祥之晨正知土膏之脈起所寶惟穀故大飲以勞農所貴惟人

故躬耕以悅使俾夫三時不奪六府咸脩遂放牛於藪澤還却馬於田疇道方齊於雨粟化實遠於焚黍務耜勸分顧勤於稷禹授時度地彌甚於殷周職乃分於九鴈政不逮於諸侯豈非人和而俗阜亦將力穡而有秋是日命丞相巡行山林道達溝瀆因物土以分宜隨川原而刊木畫為九野教種百穀實萬代之儲址况九年之所蓄猶以為不躬不親庶人不信降趨車以徵求發紅粟以恤賑絺芻不加於嬪御茅茨永慕於堯舜祭惟

司嗇蜡必田畷即異畝同穎豈獨瑞於往年象耕鳥耘
是錫羨於今運適有田父起而歌曰昞昞千畝兮理有
疆濟濟千耦兮稷既良躬三推兮供神倉分九扈兮應
農祥染盛普淖兮潔敬斯皇神之聽之兮將登穰穰

藉田賦

唐李蒙

揉為耒剡為耜取其象也遠矣農為本食為天惟其利
也大焉聖人利器致豐躬親莫重於稼穡軌物勵俗敦
勸克厚乎率先於以奉神祇昭報之誠達於以祈社稷

孝享之德宣則躬耕之義也從古以然皇帝勤惟國本
欽若人天所務惟農順動而取諸豫所寶惟穀時行而
應乎乾洎正月之吉日將有事乎昊天列千官於近甸
屯萬騎於遐阡當是時也其祭不戒而宿設其工職兢
以先後大禮備兮和樂陳嗇夫馳兮庶人走帝乃服蔥
韃乘御耦我疆我理禮正於三推必躬必親義存乎千
畝四輔冢宰六卿近臣大夫師長之族都鄙華裔之人
聖有作兮萬物咸覩人胥效乎天下歸淳且圖匱者於

其豐防險者於其逸有備所以無患克勤是用終吉三
推之禮廢則倉廩以之虛肆眚之恩廢則簡書以之佚
欽哉欽哉能事斯畢夫然則農功可大農扈允臧以農
為本子國有常令以農率下今人知向方亦既奉宗廟
亦既備蒸嘗一人垂訓兮萬國昌固有迷於日用于胥
頌美子聲洋洋

藉田賦

以復收墜典以
期農祥為韻

唐石貫

太皞御辰勾芒定位天子率躬耕之禮有司謹親載之

事以為常藉斯闕皇猷久墜不脩耒耜之功是隋末盛
之義於是擇元日戒農期本千畝而敬矣齊三日以告
之然後內外清謐上下肅祗文物之儀備列戈鉞之衛
在茲猶窺紫禁共仰丹墀儼南面凝旒之所當東方欲
曉之時漏水聲盡爐香上遲俄而閭闔開羽儀展揚青
旗以肅事備朱紘而戒典上乃望靈壇御玉輦蒼龍整
駕以前導蔥嶺遵途而右轉六轡齊舉八鸞啓行向綠
野公田之所至青郊展禮之方紺轅塞路青輅巡場叶

農經而授事指農正而告祥由是別土宜分疆理入滌
場而肆目撫御耦而舉趾遂乃執紅紉親黛耜四顧而
溝塍砥平三推而土膏脈起發生有在播殖茲始諸公
諸侯而次進或五或九而皆止見京坻之流行可期觀
稼穡之艱難有以禮樂既備人神告休事雖兆於東作
稔以見其秋收豈獨親耕於甸內實亦種德於道周羣
臣乃伏輦而進曰臣聞歷代務農百王重穀陛下興古
典之已墜紹前脩之不復故得人勤稼穡天降景福帝

曰予上事天地次奉祖宗惟舊章是率惟古典是恭今將返鑾輅而宴於太寢又欲展禮而勞農

藉田賦

有序

宋

王禹偁

臣謹按周制孟春之月天子親載耒耜藉田所以事天地山川社稷先王醴酪粢盛於是乎取之恭之至也自周德下衰禮文殘缺故宣王之時有虢公之諫秦皇定霸鮮克由禮漢祖龍興日不暇給孝文孝景始復行焉昭帝弄田亦其義也後漢永平中明帝東巡耕於懷縣

非古制焉魏氏親耕闕百官之禮蓋草創爾晉武太始
之年略修墜典宋文元嘉之代亦舉舊章齊用丁亥之
辰梁以建卯之月後魏北齊沿革有異隋朝唐室文物
可觀太宗行之於前明皇繼之於後自茲已降廢而不
行將煥先農必待真主皇家享國三十載陛下嗣統十
四年武功已成文理已定乃下明詔耕於東郊百執悅
隨三農知勸禮官博士蹈舞而草儀甸師嗇夫歌詠而
供職方拾遺直史館王禹偁再拜而颺言曰耕藉之義

大矣哉千畝之田三推之禮所以教諸侯而事上帝率
人力而成歲功實邦國之彝章皇王之大典昔潘安仁
賦之於晉岑文本頌之於唐今王道行矣王藉修矣神
功帝業煥其有光宜暢頌聲以播樂府謹上藉田賦一
章雖不足形容盛德亦小臣勤拳之至也其詞曰

十四年兮帝業遐宣寰區宴然乃順考於古道將躬耕
乎藉田務本勸農稽前文而備矣事神教養舉隆典以
行焉萬國歡心而懌懌百官供職以虔虔草儀注於有

司議沿革於遺編築壇墀之二陛開阡陌之百廛文物
聲名合禮經而有度旌旗衣服應方色而不愆既而屆
孟春擇元日太史先奏天子將出是月也道人徇路星
鳥中律當東郊之迎春是東作之平秩皇帝於是即齋
宮辭帝室戒錫鸞嚴警蹕乘青輅以有威儼朱紘而無
逸佩乎玉也懸黎之色蒼蒼載其旂焉干呂之雲鬱鬱
屬車負播殖之器後宮獻種稔之實紅縻黛耜服蔥牾
以陸離縹輓紺轅駕蒼龍而飄欵太常之禮具舉司農

之屬各率甸師掌舍警御陌以惟嚴封人野廬設壇宮
而靡失於國之東千官景從風清塵而習習雨灑道以
濛濛時也木德盛陽氣充春芒甲坼青青兮蔥蔥春土
脈起油油兮溶溶冠蓋蔽野珮環咽風狀浮雲兮隨應
龍旂幟張日車徒塞空若衆星兮環紫宮修農事以惕
惕襲春服之重重爾乃配少皞祠先農尸祝無媿豆籩
以供太牢之牲薦之而肥膾太族之樂奏之而舂容於
是修帝藉勞聖躬撫御耦以無怠履游場而有蹤將循

乎千畝之制豈止乎數步之中耕鈞耜之弄田但矜兒
戲修建康之春藉未煥農功有以見萬乘之尊三推而
舍或五或九降殺之義有倫爾公爾侯貴賤之班相亞
嗇夫灑種以斯畢庶人終畝而告罷千耦其耕煥乎禮
成播百穀兮率人力歌載芟兮揚頌聲將見乎餘糧棲
畝腐粟如京神倉令納乎黍稷以備粢盛廩犧氏收其
藁秸用餉犧牲親畎畝兮化被重民天而教行自得訓
農之實非貪慕古之名然後下青壇歸絳闕百姓知勸

羣后咸謁在鎬之宴啓歌虞之音發獻萬壽兮歡呼奏
九韶兮鏗越開三面以行惠宥五刑而審罰恩流於孝
弟力田德被於雕題辨髮興五土之利固必躬而必親
同三代之風復不矜而不伐大矣哉藉田之禮豈三年
而不為躬耕之義將百代而可知我所以舉久廢之禮
定不刊之儀慮弗勤於四體將有害於三時務農桑兮
為政本興禮節兮崇教資民乃力穡歲無阻饑神農斲
木之功我其申矣后稷播時之利我得兼之供拒鬯以

斯在介豐年而有期丕顯事天之禮誕歌祈社之詩祀
山川兮神鑒明矣配祖考兮德馨遠而永錫純嘏用光
孝思乃作頌曰倬彼東郊公田是闢大君戾止言耕其
藉帝藉既修乃及公侯親爾來報勤爾田疇言采黍稷
祀於圓丘億萬斯年以承天休又曰倬彼東郊耕壇其
崇大君戾止言訓其農農功既督乃知榮辱爾家以給
爾人以足言奉烝嘗享於此屋億萬斯年以介景福

躬耕帝藉賦

明

顧鼎臣

帝在位之八載兮大業朗以遐宣闕兩儀以作宇兮掩
六極以為鄺四時肇其順序八政飭而罔愆惟東南兮
薄海暨西北兮窮邊莫不去氈裘而襲弁帶服鉉耒而
止戈鋌猶且邈王業之本念民事之艱憲古昔以示勸
躬往耕乎藉田是月也星麗辰角日移參尾太皞司辰
勾芒佐理律應夾鍾節惟雨水當木德之在馭見斗杓
之東指膏肓漬於原隰協風被於蘭芷林含煙以蔥蒨
華綴露而旖旎長川瀲兮流碧芳草靡兮成綺倉庚忽

其有聲田務作而伊始羌萬井與千廛咸戒期於于耜
先是乃命司空治館金吾視壇行宮起乎國東制作準
於星躔周垣遼而匝地閣道絡乎中天絳殿崔嵬而燿
景燦闕皮業而凌煙華蓋螭翻而護略旋廊虯結而蜿
蜒青幄儼其雲駐翠幕颺而氛連有觀穡之崇臺隆隆
岷嶺乎其間俯平疇於大野激流承於原泉闕方中兮
千畝亘四徼兮陌阡若天造而地設以待我聖天子之
幸焉爾乃即齋宮坐宣室儷朱紘戴青幘祝史正辭巫

咸獻吉瑤輅朝嚴金根宵飭服蔥牯於紺轅駕蒼龍以
縹輓後車備播殖之器中宮獻種稔之實前旌裊裊依
然千里之雲佩玉蒼蒼穆矣懸黎之色已乃勾陳肅隊
招搖啓途六軍雷動萬乘風驅叱豐隆而扶穀呼蒙公
以附車乍鳴鑿以颯駭倏揚旆而景靡青縞繽紛於震
兌朱元飄颺乎坎離方彩錯其外列黃屋屹以中馳前
披雲以建纛後捎星而曳旂左緯繚兮撓旃右幟纒兮
洪頤恍天旋而斗運矧岳轉與山移爾其五輅方行九

門乍啓雉尾繞以朱翬望東郊而直指似太陽之初升
瑞靄紛其抱珥既而屬車駢駢纖塵弗驚花飛飛以夾
路草幕幕而侵輪似青帝之時行品物鬱以芳新若乃
千官景從車徒塞空飛蓋結而如霞鳴佩咽其從風似
三垣之列宿旋繞依乎紫宮已而崇卑在列直廬周設
循芳甸而徐轉紛綺繡其如纈似應龍之迴翔玄雲藹
而四合若其埜曠天清和鑿有聲絲管啁啾以嘲晰鐘
鼓訇磕以砰砢似春雷之啓蟄震百里而皆驚至乃士

女咸集耄倪沓至盼翠華之來臨歡聲騰而動地似百川之赴海奔濤譎而聲沸爾乃享后稷祀天農奠蒼穀與玄醴燎芳桂與香藟太牢薦而肥膾太簇奏而春容既用虔於裸鬯乃躬即乎田工於是京兆授鞭司徒獻耜巡沃野之墳腴望平壤之如砥儼洪縻之在御撫紺耒而成禮懷炎農之務穡想崇伯之疆理四顧而溝塍鱗次三推而土膏脈起諸侯諸公咸以班而遞進或五或九洎終畝而方止陟巍臺以遐眺觀萬民之舉趾一

人有慶既穆穆以皇皇百辟致辭復雍雍而濟濟大猷
之典將行享醴之譙斯啓時則有大宗伯捧策而進曰
臣聞民之天在食國之本惟民伊藉田之大禮實累代
之攸遵善乎號公之言上帝之棗盛於是乎出民之蕃
庶於是乎生事之供給於是乎在和協輯睦於是乎興
財用蕃殖於是乎始敦龐純固於是乎成者也彼千畝
之不藉固取誚於麟經伊元嘉與泰始亦徒具乎彌文
今我陛下應農祥而發令順陽氣以時行舉百王之令

典循列聖之法程藉千畝於畿甸勤萬乘以躬耕勸三
農以崇教本播四海而揚頌聲想餘糧之棲畝將腐粟
之如京載在國章既以示勤民之政藏諸御廩抑以薦
明德之馨大矣哉此之為禮蓋將邁前休而建極啓來
哲而為經者矣爾乃天子茫然而思驟然而嘻曰唯唯
否否卿知其一未知其二予竊感於茲行實有資於治
理是故邇陌井分遐畝繩直水縈帶以環注睇四封之
如一此亦予一人之莫域也霖雨如膏隕露如飴春苗

灑而綠淨秋隴滴而黃滋此亦予一人之施澤也菽藿
特畦禾黍異田任土宜而播殖亘廣陌與橫阡此亦予
一人之軌物也藝此嘉植殄彼蠹蟲刈稂莠使靡遺樹
蘭杜於近疇此予一人之樹德遠慝也蓋黍稷馨香藟
豆以飭者孝之則也三時不遺唯農是卹者仁之錫也
度土任宜深耕易植者政之式也天子所以念稼穡之
艱難躬胼胝而無逸雖六府之孔修猶日慎乎一日豈
止於奉遺典而遵修慕前文而潤色者哉於是上宰元

臣載拜稽首奉萬歲之觴上一人之壽鑄玉冊於金縢
勒鴻猷以垂後遂作頌曰於惟上聖轄化權兮洪澤滂
瀉溢八埏兮百祀咸秩禮則虔兮迺藉千畝國之原兮
朱紘蒼佩造彼壇兮帝既至止三推先兮三公九事墜
以班兮厥禮既成兆民喧兮勾芒太皞覲而歡兮百千
雜遝扶轄還兮農用震動庶殖蕃兮粢盛恪共盛所蠲
兮穰穰其瑞應罔愆兮百穀膻膻大有年兮耒耜萬里
息戈鋌兮如陵如岡萬福駢兮登義越軒古無前兮天

子萬壽配彼天兮臣拜稽首頌斯言兮匪臣則文盛則傳兮

擬聖駕躬耕藉田賦

明 馬象乾

皇帝嗣服之七載也張天網理地維恢帝驟廓王馳度
貞化協文恬武嬉滲漉周於遐邇威靈暨於華夷道德
媯夫堯舜治理躋乎黃羲乃求掌故爰稽典儀文在茲
矣有其舉之維時夾鍾應候東作方謀陽氣上蒸土膏
潛流農祥辰正乎南極協風駘蕩於西疇勾萌達而桃

始華品類育而鷹化鳩天子茂對時物慨然思曰民生
在食國事在農時至事起天運人從循哲王之遺規步
上古之高蹤將率先乎萬姓奚安居於九重乃命宗伯
定儀司空除地甸師清塵田畯具器挈壺諏播殖之辰
僕御備啓行之騎於是金門初敞銅漏既殘旭日纔臨
湛露未乾天子駕翠虯御青鸞乘玉輅出金鑾服蒼龍
之袞戴朱紘之冠曳輕霞之寶篋捲揭霧之長竿夾道
陳而霓旌擁周廬列而羽騎寒六飛動而香塵起千官

護而珂珮珊珊覩翠葆乎天上儼黃屋於雲端爾乃遵紫
陌以來思望青壇而至止念稼穡之艱難遡黍稷之伊
始旅我籩豆饋我簠簋祇祀先嗇以綏福祉牲醴膾兮
穀既登鬱幽灌兮酒且旨祝史陳兮蕭艾升明德馨兮
勾芒喜爾乃金絲迭奏鏞鼓偕鳴嘈嘈晰晰填填鈞鈞
地官進耒天子躬耕紺轅黛耜蔥轄縹衡二墀而青陽
動三推而黃茂生嘉種播夫種稜執事徧乎公卿一以
勸稼穡一以供粢盛孝承乎宗廟仁逮於編氓匹思文

之率育陋鈎盾之虛名張古今之縟典續帝王之休聲
爾乃大禮成勞酒舉皇情暢需澤普金罍列犧象之尊
角觝雜魚龍之舞玉管下鳳凰桂醕傳鸚鵡洽歡心於
百辟播盛美於萬古是日也屬車載路觀者比肩侍從
勳衛之臣星羅輦轂都人士女之衆雲集郊廛歡聲騰
而動地塵光起而蔽天咸舞忭乎盛世齊預卜乎豐年
及夫伶工徹樂有司告竣鴻卿唱畢鳳駕言旋佳氣浮
而九衢曠斂春風淡而雙闕霽煙羣工呼嵩者萬庶人

終畝以千天子猶凝神宥密養靜穆淵時咨者碩日御
細旃念有生之疾苦軫無告之顛連矇瞽進豳風之什
殿廷繪無逸之篇崇節儉則澣濯著議賑貸則逋負蠲
待凝丞若師保比誨䟽於韋弦無益之務戒於弗作不
急之官令在必捐宜乎仁聲遍九有恩光被八埏也重
曰於鑠維皇以乘乾兮既類於帝修藉田兮思樂甸畿
翠幕褰兮惟皇戾止萃輕輶兮親我穡事告牲牲兮執
耜舉趾遵遺編兮風行化馳覃幅幘兮禮明樂備信無

前分赫赫中興過周宣兮

耕弄田賦

以宮裏為田勸
率耕事為韻

唐王 棨

漢昭帝之御乾時猶眇年能首率於農務遂躬耕乎弄
田理叶生知蚤識邦家之本事殊兒戲斯為教化之先
當其天駟既端土膏初起命開鈎盾之側將幸上林之
裏有司於是整溝塍修耒耜別置膏腴之所取法百廛
旁觀齷齪之間如方千里帝乃駕雕輦出深宮展三推
而不異藉千畝以攸同且曰朕位極元首身慙幼冲每

訪皇王之業無先播殖之功未遂躬親於彼神臯之內
聊將樹藝於茲禁苑之中然後俯天顏擁農器向畎澮
以懋力對鋤耰而多思豈無宴樂不如敬順於天時亦
有遊畋莫若勤勞於農事是則非同學稼粗表親耕既
留心於東作寧無望於秋成環衛近臣盡起西疇之興
宮闈侍女微生南畝之情於時稼政既修稻人是率千
牛之列有序九扈之官咸秩神農舊務嘗廢於他年后
稷餘風復興於此日嘉夫戲或是戲為勝不為審殷臯

之由此知艱難之在斯自昔庸君多昧三時之務惟茲
少主能分五地之宜故得教化下敷皇猷上建人志荷
鍤之苦俗有帶牛之願因知翦桐葉以命封未若耕斯
田而天下勸

千畝望幸賦

以將興隆典允
屬聖期為韻

唐

闕名

國重農事帝遵時令惟千畝之可親望三推而闡盛田
峻方勤於稟法甸師已切於承命陽和初布庶平東作
以勸人逕術既端終俟南郊而見聖當其融風式協韶

景方遲金根為順動之馭莒葉表親耕之期度以地狹
難容足列公車之數顧其土膏潛動可陳農器於茲脩
隴惟直遐阡甚夷是宜率諸侯大夫以行乎周禮不可
使四年正月獨稱於晉時言瞻耒耜志惜墳衍謂昉昉
而足得天臨想澤澤而正宜春淺空為散地尚鬱新典
載芟未及勾萌之出何因一墾為期螻蟻之誠願展翠
幕猶闕朱紘未至當人力可借而成功使農祥失正而
奚利染場之履期剡剡以輕移撫藉之衣想襜襜而如

墜且夫事遵禮動法貴聖興顧井田之君是可出而偕
作懿初耕之帝宜其德以相成不然則無以知土宜慰
人欲使其種桂克備案盛乃足庶見其耘之耦一一具
陳必報乃求之倉纍纍交屬况以近甸堪樂元辰以良
借百步之疇冀停雲罕脩三班之令期在月將如此則
樹德咸滋訓農惟允畢力克符於地事致誠不昧於畦
畛儻禮備而必行實以表乎仁之至義之盡

繭館賦

元

劉聞

繫坤后之莫位德上配於乾剛宜尊安之莫媿匹垂拱
於無疆嗟勉勉之靡寧兮豈先勞於嬪嬙立婦道於天
下兮匪至勤其奚彰當時物之代遷兮撫春熙之載陽
感戴勝之和鳴兮矧柔桑之遠揚豈不思夫逸豫之為
娛兮念蠶事其敢忘飭妃御以同心兮尚服勤於懿筐
彼蠕蠕之微生兮初若有而若亡羌續紛其日滋兮亦
娟娟而有行忽三旬而獻功兮儼管簿之是將慚內職
之賤微兮近君后之清光后翼翼以祗承兮曰三盆之

有常斯繭館之有典兮匪漢志之荒唐瞻內地之深嚴
兮鳳幄騫而高張綺䟽散彩於雲霞兮文棟比隆乎穹
蒼挹和薰於上苑兮分淑景於長楊當后車之戾止兮
芳菲菲兮滿堂肅佩珥之環拱兮擁翟揄而煌煌非煙
郁其若烝兮探寶鼎之蘭湯悅曙星之磊磊兮浴紋波
之微茫粲玉潔以金輝兮眩滿目之天章手其益而逾
恪兮不敢亟其敢遑禮有數而恐瀆兮心與縲而同長
曾畢事之憚勤兮想專能而廢讓願相成之在下兮加

黼黻而青黃被玉體以無斁兮穆將祀乎先王豈寸絲
之為潔兮致吾皇之齊莊庶神鑒之不遺兮答靈貺其
穰穰與六合以同釐兮賴一人之壽康揆繭館之禮意
兮嗟漢氏之未詳惟茲禮之有初兮抑嘗稽夫公桑與
藉耕以並列兮豈但警夫怠荒昭勤敬於人神兮罄厥
忱而巨量慨墜典之僅舉兮何古風之涼涼彼弄田之
有耕兮徒游玩於未央矧掖庭之奧邃兮曾女紅之未
嘗宜繭館之盛制兮不與蠶室而同臧撫壺化之寥寥

今徒頌美於永平之椒房也

繭館賦

有序

元 楊 撫

古者天子躬耕以供粢盛后親蠶以為衣服重祭祀也
漢之時躬耕之典常行親蠶之禮亦具則視以為勸農
桑之本藉田前有賦之者矣則繭館可不賦乎賦曰

若稽古昔禮重親蠶后受獻繭手盆者三固所以重祭
祀之服亦以敦裳衣之原維繅繭之有館槩古制之未
聞想其密邇公桑旁達內宮層構突兀迴窻玲瓏靚深

邃窈廓其有容風薰薰兮南來日融融乎西東夫人世
婦被之僮僮夙夜匪懈服勞其中雖主后之尊寵亦志
存乎女紅方春日之載陽桑柔柔其初綠念蠶事之當
興早已勤於被浴曾日月之幾何羌成功之我告服其
禕服載祗載虔保姆左右師傅後先鏘珩璜兮琚瑤儼
神明之在前違詩書越圖史造繭館畢蠶事爰舉首而
旁觀爛芳繭兮盈目或黃如金或白如玉嘉爾勤勞我
寧不勛繅所獻之毫芒手三盆而奚足曰禮制之孔嚴

恐過之而反瀆爰分布於諸宮俾繰繭而獻之告我君
以成事命夏人而染茲夫以天下之大奉一人之私亦
有筐纊亦有貢絲何瑣瑣以爭利得無愧於去織之公
儀黼黻文章繡裳袞衣於以享先王於宗廟祀上下之
神祇昭誠孝於無斃皆待是而有為豈無禽也必親獵
以登俎亦有黍稷必躬耕而盛粢匪盡已以致潔寧吾
心之敬虧君不能以自蠶茲誠后之責歟雖三繅之不
難要役志之在此俾吾民之有聞亦戒飭其婦子以至

尊而忘勞况吾曹之貧窶成天下之亶亶將不能以自
已家衣帛以忘寒疇無衣以卒歲誠興利之善機詎去
織之可擬慨兩漢之舊章惜名存而實廢嘉永平之能
行何禮文之誇靡竭鄙才以鋪張寓制作之初意今聖
人之在上心敬天而勤已揆古今之禮儀將以時而畢
舉倘承乏於詞臣誓洗心而頌美

蘭館賦

元
曾
策

豐沛興雲萬方受圖開重熙於奕葉著儉德之宏謨既

躬耕以勸勤豐御廩之儲需念化下之有道又繭館之
異區爾其館之為制也不莊不麗匪雕匪斲弗事金碧
弗崇丹堊髣髴太古棟宇初作溫溫房櫳肅肅幃箔海
色曉而分曙天光垂而下灼迨夫蟄戶啓封蠶紗受風
司晨展日內官盛容詔閨中之麗質掇上林之芳叢伺
眠食於三泮奏成功於九重輟椒殿之清燕勤茲事之
親供匪好勞而惡逸期黼黻於聖躬爛日月之昭彰鬱
璀璨於山龍稽古象以制作察天章之蒙昔於以迅鴻

禧延景命昭儉素示丕敬是以居之者必可嗣皂綈之
徽音贊之者又足以續辭輦之貞靜而後於斯館為稱
也夫何子雲舍是而賦長楊五柞之雄孟堅無知而詫
昭陽牆宇之盛遂使一代曠典僅紀於漢禮之足徵諸
儒摘之又以附會乎呂韋之月令吾嘗觀夫井幹麗譙
層城披香椒風嶠嶠而霞舉甘泉絢煥以雲翔炫金鋪
於繡戶煜朱彩於虹梁角道夾以縈紆周廬列以成行
迨後嗣之末造曾何足與繭館而齊芳嗟夫神禹卑宮

黻冕致美堯階茅茨軒裳是理何帝王之恭儉華采衣
之靡靡豈不以文章者治體之由明服飾者等衰之攸
紀此繭館之為庸得以著名於漢氏之禮也猗歟皇元
聖繼神傳宮壺之內莫不有媯虞任姒之德又豈可以
漢之繭館而並言方今聖皇御厯郊禋肇舉爛五雲之
披披罄八荒而成觀鯁生未敢盡繭館之鋪張行且造
明堂而獻賦

帝苑農蠶賦

有序

明
廖道南

辛卯八月十七日恭遇皇上親祀帝社帝稷於西苑簡
命勳輔卿佐暨臣道南凡十一人克陪祀官禮成上御
無逸殿面諭錫宴既而周覽幽風亭駕始發臣猥以末
僚遭茲盛典天顏咫尺叨陪晉晝之榮帝眷殊常申錫
需雲之寵駿奔兢惕燕樂揄揚臣誠歡誠忭稽首頓首
上言伏以國之大事在祀與農民之厚生惟衣與食蓋
耕桑為王業之本而土穀成坤祗之靈稽古神農肇作
耒耜思文后稷率育來牟公劉古公紹厥勳王季文王

弘其緒惟成王守文武之基業故周公陳稼穡之艱難
在書則叙商之三宗以及於祖烈於詩則述豳之七月
而采其民風啓八百年有道之長遺千萬世無窮之利
厥後藉田廢而虢公納牖敷言至於蠶績休而褒姒厲
階興刺勸懲具在龜鑑攸存歷考垂訓之格言實為傳
心之要法茲蓋遇我皇上體天地之大生備聖神之至
德敦庸五禮郊廟之典告成軫恤三農軍國之需攸賴
敷求禹則徽煥堯章惟聖祖紹田功於中都之鄉惟文

皇啟邦土於西苑之地仰懷世德上感淵衷顧仁壽之
宮原可以樹桑而播穀御昭和之殿室於時撫景以揮
毫奎文燦爛乎龍光雲翰輝煌乎鳳翥對時育物相土
命官首營帝社帝稷之壇次建省耕省斂之所殿名無
逸恒操祇畏之心亭扁豳風益勵憂勤之志爰修齋室
更築桑臺倉恒裕而百穀用登門迎和而諸祥畢至靈
鵠雙儀於皇闕誠哉孫子之昌嘉禾連穎於天田允矣
神祇之貺乃屆仲秋之月爰諏穀旦之辰慶平秩之西

成追報賽於前古禮文裁於聖制孔惠孔時樂律發乎
宸章盡善盡美至誠克享明德惟馨伏望保泰持謙令
終有俶履豐思豫永觀厥成建皇極以福庶民遠邁周
王之盛懷重華而光列祖永孚虞帝之休臣謹撰帝苑
農蠶賦賦曰

緊皇明之啟運肇農蠶以耕織惟王業其根本惟民生
其衣食曰無逸而乃逸茲先務之為急闢地利以無疆
法天道之不息惟我德祖爰卜京土衍顛頊之苗裔派

句容於江滸惟我懿祖隱約田里邁種德於幽潛穆玄
風乎太始惟我熙祖渡淮寓泗履險危以多難垂令聞
於不世迨於淳皇乃遷東鄉崇朴茅茨感異麥場靈應
駢臻而載震載夙祥徵長發而俾熾俾昌篤生皇祖受
天之祐乃聖乃神乃文乃武風雲景從而三靈協助日
月貞明而五星順度惟歲壬辰鍾離之邨釋耒耜而造
邦歷百戰其續紛惟歲乙未金陵之地盡疆理而經野
崇九鼎其顛負惟歲丙午奠璧園丘諭太子以稽事咨

農工之是憂惟歲壬子瘞琮方澤戒后妃以素服虞蠶
工之弗克惟歲戊申眎土發春躬耕藉田而噫嘻斯興
惟歲丁未禱雨致祭親涖雩壇而儉恭益至闕耘鍾山
乃步龍岡遵阡陌而於邁視襁襝其如傷觀獲後苑乃
召鑿坡輟警蹕而弗御詢菑畲之如何蓋我皇祖首物
冠倫積功累仁欽天禮神養賢牧民而佑啓億萬載之
太平者誠務農蠶為之本焉者也惟我皇上同符祖德
丕顯文謨丕承武烈修六府而重土穀敘九疇而爰稼

稽歲惟辛卯月惟季春太昊司令勾芒應辰條風時來
而玄鳥降協氣日至而倉鷓鳴是月也日惟己丑木宿
角垣乃駕鑿輅乃抗龍旂軫東作之伊始指西苑以來
觀於時歷文祖之宮原思開創之舊業乃召輔臣乃召
宗伯對時育物而胥豫胥游相土辨方而爰經爰畫爾
乃御昭和之碧殿臨太液之清波宸翰飛灑於雲霞天
章輝煥乎星河是即帝堯之間衢室而授民之時帝舜
之訪總章而敷天之幾也是月也日惟辛卯土宿畢觜

乃諏筮氏灼元龜諧蓍人揲泰著相陰陽之攸吉區原
隰之咸宜於時昭告於列祖宣令於百工乃召司徒乃
召司空遵師贊謀而土圭以測匠氏効力而水臬是從
爾乃營帝社以統五土營帝稷以統五穀敷施元始乎
乾化煦媪貞成乎坤育是即周雅之歌冢土而為國祈
祀戴記之紀王社而為民介福也迺又建無逸殿於仁
壽宮之前棟隆元吉材良孔堅藻繪敦素結構聯繇中
揭獻皇農家之詩以彰先德之兢惕旁列周書無逸之

篇以述古人之艱難於殿之前亭曰豳風飾不過華制
不侈崇奎圖赫奕鉅碑穹窿詠公劉之勤苦表姬旦之
精忠昭昭乎炳蔚如虎豹煌煌乎天矯如虯龍也迺又
建迎和門於仁壽宮之東璇題映旭黻枕飛虹軒聳特
起周遭旁通仰穹端於泰清以達風露之氣俯壤倪於
泰寧以贊水土之功於門之南亭曰省耕平疇曠衍方
池湛清風興自宮時往於亭鳩田畷其至喜勞農夫之
可矜霑霑乎翠華之光被鬱鬱乎黃茂之蔥菁也迺又

建恒裕倉於仁壽宮之北我黍與與我稷翼翼其崇如
墉其比如櫛乃求千斯倉以供神明之祀乃求萬斯箱
以備軍國之實於倉之側亭曰省斂萬寶豐登百室充
瞻夜漏向晨宵衣待旦嘉平秩之西成幸粢明之足薦
忻忻乎免下民之怨咨蕩蕩乎孚上帝之申眷也其
種桑之園則於彼宮垣之西蔭綠樹之扶踈暢青陽之歲
蕤既培佳屨復翳茂楨雍氏芟其繁蕪柝氏䟽其荒蕪
其採桑之臺則於彼軒墀之陽躋崇基之靈峙攀柔條

之遠揚取彼曲植執此懿筐儉勤取則乎郊女莊恪遺
戒於魯姜其飼蠶之室則於彼殿庭之陰屈鳳輦於嘉
月集蠶婦之如雲叢箔班班密葉臻臻帝純服之所自
出后鞠衣之所由成其縹繭之館則於彼蠶室之區含
天駟之真精監織女之靈輝七襄成章三盆就絲西陵
氏創其緒業宛窳氏淑其範規是故坤儀靜專以亮乾
元之化陰教明章以宣泰陽之亨緬思古人實獲我心
葛覃樛木克成內治螽斯麟趾垂裕後昆其所關係者

大矣其所由來者遠矣猗歟盛哉我皇上之重農蠶以
為天下先也夫其成功於苑中也經始於春暮就緒於
秋仲樂庶民之子來歆百神之罔恫其中則東有萬春
麗春永壽長春接珍膳而五穀馨西有延壽景福安喜
仁和御延和而百祿多其外則東有樂成崇智涌碧翫
芳俯臨漪而鳧鷖翔北有仁智介福凝和承光望廣寒
而草樹香乃若金鰲玉螭積翠堆雲星橋迢遞於滄溟
金露玉虹方壺瀛洲危亭屹屹於玄丘擁翠飛香太素

歲寒華楮岷嶺於紫壇遠趣會景澄波映輝黛梁曖曖
於翠微至於兔園之山龍洞之泉環珮琮琤乎石林珠
璣絡繹乎水簾鯨海之嶼鷗沙之渚荻荇參差乎流洲
芝蘭芳郁乎平圃是皆我文祖經營之豐址是故務本
之訓德音在耳颯颯乎萬善之紀也我宣廟游觀之靈
圖是故織婦之詞嘉謨如舊明明乎三接之畫也我皇
上尊祖敬宗參天兩地駿烈邁乎百王鴻猷徹於萬世
是故祈禮行於春也克慎厥始報禮行於秋也允成厥

終樂章裁於聖制儀節定於宸衷至止肅肅有來雍雍
武貂蟬而簪纓整飭文鶴鷺而環珮春容鳧鐘鼉鼓龍
遂竊焉蕭鏗鏘其並奏彩翬丹雘朱干玉戚綴兆其來同
三獻方升百禮既崇主拜於前臣拜於後覲天顏於咫尺
誠動於此幾動於彼致帝祇之感通昔者韶鳳儀虞
神龍啓唐赤鳥開周玄鳥生商德盛者其福備祥多者
其國昌我皇上體信達順建中致和天惟降康而載錫
甘露地不愛寶而屢清黃河宇甸疊呈夫瑞麥天田彌

獻夫嘉禾靈鵲雙翔帝座兆前星之曜郊禘特舉仙源
澄少海之波迺知一敬立萬善備矣二氣和萬物育矣
三農成萬事具矣四靈至萬神應矣五福膺萬祀永矣
臣拜稽首以矢其音歌曰帝德高明兮配天惟天資始
兮錫茲豐年帝德博厚兮配地惟地資生兮登茲廣利
帝德祇慎兮法祖惟祖垂統兮申茲多祜帝德純孝兮
顯親惟親遺澤兮昭茲至文吁嗟農蠶兮帝苑西天施
地成兮萬國重熙噫嘻謨訓兮帝苑中祖澤親仁兮萬

世攸隆

勞酒賦

陳江總

在陽春之仲序覽具物之芳菲帥公卿而播百穀親耒
耜而命三推開青壇於迴甸列翠幕於清沂乃遵執爵
之典爰降食革之讌豁朱鳥之高牕啓黃龍之抗殿奏
帝鴻之萬舞動鈞天之九變顧曲私之亭育遞寒暑而
徂遷謬陳力而策駘豈酬恩於暮年

御定歷代賦彙卷五十一

御定歷代賦彙卷五十二

典禮

貢士謁文宣王賦

以題為韻

唐 黎逢

聖人沒而教在明王興而道宣命上公以陳信展大禮
以登賢觴酒豆肉金鏞莞懸致克禋以如在當質明而
不愆祁祁諸生必恭敬止廓廣庭以容衆義高冠以脩
已臨奠獻之筵肅造秀之士階間儼以成列槐陰布以

如市將備禮於先師遂儲精於祝史於以致君恢復王
化弘闡人文磬音繼於夜杵燭影迎於朝雲見曲暢於
和易知具歆於苾芬肅肅階祀陰陰門闕喬木棲於暮
煙前軒滿於行月羣士沓而歲至庶工齊而曉謁上玄
酒以清滌間朱絃而踈越齊百王於建號歷千古而未
歇蓋以教俟天地而不朽功格宇宙而不伐不朽故可
貴不伐故彌彰仰而不及融然有光實橫被於歷代獨
崇輝於帝唐德教不輟王猷有昌日尊師於朝歲求士

於鄉教之於右塾登之於上庠知本末之可務亦師師
而不忘將歷試於宗伯必先謁於素王古先哲君任土
以作貢洪惟我后嘉善而容衆猶冀獲師於卜獲相於
夢時哉康哉宜阿閣之巢鳳

太學觀春宮蓋胄賦

以德成教尊在
乎蓋學為韻

唐
闕名

我聖人之有國酌古訓建皇極太學備崇儒之禮春宮
孰蓋胄之則宗伯貳事司成奉職叶三王之教可知順

四時之儀不忒域中於是乎宣化天下於是乎觀德既而儲駕戾止虞庠肅清傾章甫之列駐和鸞之聲讓其齒也長幼之節著明其親也父子之道成達其尊也君臣之義行疑三善兮皆得實萬邦兮以貞故曰先知後為上行下效弘當代之楷式奉前王之德教於以識尊卑之倫於以觀莊敬之貌大矣政本至哉化源膺秬鬯之不列訪典謨之格言揖讓於詩書之府雍容於禮義之門敬其學而德至親其師而道尊青青子衿其容不

改疊疊儲嗣其福斯在則孰能不恭而志佚孰能不學
而思殆所謂遵萬民刑四海也鄒魯儒士文在茲乎依
稀兮翔集闕里髣髴兮詠歌舞雩七十子兮三千徒實
將執經以問豈獨摳衣而趨哉則知大學之義國風之
始在明德在貴齒禮師臣延曹子尊賢所以抗法講藝
所以惇史有觀者曰玉琢成器人可不學亦因此習禮
樂夫如是實國家之大柄而德行之有覺

養老乞言賦

宋

范仲淹

年高者不可不養言善者予取予求奉黃髮以無怠垂
清問而弗休主善為師尊從心之耆舊既飽以德咨逆
耳之謀猷仰彼前王垂茲令典謂仁者所以能受則言
也於斯可選肆筵授几聿修尚齒之宜論道經邦必採
無瑕之善莫不崇其盛禮納以明恩登上庠而有則躋
太學以居尊待以常珍用貴皓然之士裨其闕政是詢
哿矣之言養老之美於斯有以一則崇孝悌之本一則
求善教之旨式宴且喜蔑聞大耋之嗟切問近思屢逆

聖人之耳豈不以老者倍年之長言者善人之資養其
老則惟賢是擇乞其言則患已不知識君臨之所重見
父事之攸宜不素殮兮實舉燕毛之禮善待問者當陳
補袞之詞是知舍此則無以尊德遵此則足以守國大
禮載之而為美前王行之而不忒漢朝定嗣延四皓以
咨謀周伯興邦奉太公而取則恩斯勤斯故舊不遺孰
侮桑榆之暮景每求藥石之良規祝體無虧何患乎老
夫耄矣沃心有取但見乎聖人則之今國家治歷萬邦

緝熙庶政納老成之嘉話闡誕敷之休命於以見至道
勃興與唐虞而比盛

貢舉人見於含元殿賦

以題中字為韻

唐

闕

名

國家開文學之科旁求英彥爰將貢於禮闈命先叅於
秘殿欲使懷才抱器自此鷹揚當令較伎呈能從茲豹
變是以儒風益振睿澤惟新設薦舉為教化之本致朝
見為榮貴之因庶使八紘碧嶂絕卧雲之士遂令萬歲
彤庭觀獻賦之人莫不張文柄以旁羅詔諸侯而上貢

俾離邦去里若攀龍附鳳或稟間生之瑞出則驚人或
懷希代之珍來皆動衆期美祿必取期殊科必中莫不
遠湊天闕爭趨帝閣曹劉慶至賈馬雲屯當仲冬月候
丹禁門於時銅壺尚滴粉壁猶昏驪駒波躍蠟炬星繁
俄而鐘斷長樂殿啓含元中使森而鶴立諸生凜以駿
奔進抑退揚儼褒衣而設禮左旋右折俯丹陛以陳言
曰臣等才非可升德非可舉幸以辭乎海上達彼君所
今則凝神注目無非繡戶金鋪接踵比肩盡是鴻儔鶴

侶歡聲數四周覽再三散漫而龍池霧起參差而宮樹
煙含既而中貴遙宣勞卿遠見咸精筆陣勉赴文戰時
康俗泰終有待於英髦擇善搜賢本無遺於寒賤諸生
乃退行列整簪裾瞻鳳宸獻玉除俟青春而變化有望
當聖意而光輝有餘集鴻都而固難比矣會虎觀而未
可加歟則唐之盛也堯舜不如

龍虎榜賦

元
方君玉

伊人才之殷盛闢氣化之淳龐或降神於山岳或隱迹

於湖江乃植緒而佐治亦獵熊而興邦惟君心之渴賢
斯天意之賚弼非同氣之相求豈鬻名而自失觀大唐
之啓運當十葉之明君天步既危而復安治象革故而
鼎新時貞元之八載詔髦俊之來賓八紘為之雲合多
士為之駿奔思騰驤於千載妙變化於昌辰眷兵部之
忠諫俾臚傳於縉紳慶一榜之多賢實司舉之得人惟
歐韓崔李之傑出豈王楊盧駱之可倫宜貴游之奪氣
自孤雋而奮身聚精神於堂陛駭耳目之通津絕深林

之長嘯起大澤之幽吟風生大王之雄雨注四海之霖
既出類而拔萃爰附翼而攀鱗偉然上國之觀炳乎一
代之文迨元和之盛治由啓迪之憂勤或從橐之迭居
或學館之屢循或任專於鈞軸或職掌於絲綸或判戶
部而無獻或因佛骨而極論卓愈觀之忠賢固超逸乎
宿羣嗟瞻觀之穎異乃賦鵬而傷神彼委任之不終復
竄逐乎相尋獵昌黎之山斗足橫絕乎古今幸昭代之
興賢尊孔孟而設科擢郊數之遺材屬文衡之不頗露

虎豹之一斑借轍鮒之餘波為士者莫不蘄然出頭角
明目張膽喜而為之歌曰南山霧隱母久蹲兮一石舊
水寧泥蟠兮泰和雍熙生逢堯舜之君兮都俞吁咈豈
無龍虎其臣兮陋哉唐榜虛名其奚足以擬於有元兮

經筵賦

明
羅萬化

皇運赫以繇暢兮奠寰宇而垂休承奕葉之炳靈兮廓
玄貺於九州匹乾坤而並立兮聲教藹其旁流紹五帝
之遐軌兮績三王之秘謀洞古今而魏陟兮班紛紛其

寡儔弘道德以為師兮宵何微而弗周固神聖之間值
兮心猶勤乎懋學維六籍之誕列兮辭繁而義確往迹
獨標於紀載兮淑慝淆而罔覺所貴恣探討而措之治
兮曾不畏乎幽邃彼常情猶不敢就逸兮矧君臨夫萬
邦體黔黎而宅至道兮將挽茲世於醇龐窮浩渺而下
躋兮運妙有以成功寄啓沃於臣鄰兮恒居高而懷冲
洪圖丕樹以軒朗兮偉制御之玄蹤心切達聽而罔攸
斃兮用咸覲德以雍容爾乃闢闔闔而凌鴻濛兮光熠

燭以紛播乘輿掩映夫朝陽兮珮聲起而颯作儼翕赫
以鱗集兮旌旗斐亶而騰霄干將玉戚凜其森衛兮迎
豹尾之颯颯甘泉與朱史兮嶺容從而襲瓊瑤象懸
圃之遼曠兮厥伏殊待而絕乎浮囂乃召儒臣兮鳴玉
鏘鏘爰啓經幄兮圖史輝煌擷堯舜之耿烈兮揆禹湯
之休光文武丕行於姬公兮侈敷奏而對揚闡仲尼之
微言兮洙泗遠而愈昌鑒戒備於緇帙兮惇訓迪其有
常效入告而殫嘉謨兮亶燁燁乎永臧英哲忽焉已遠

兮宛儀刑其孔章苟精誠之積著兮孚鬼神而烈金石
值虛懷之咸受兮沐休明之渥澤牙籤遙映乎紫薇兮
爐煙縹緲而飛擲彤雲細護於鸞禁兮陰窈窕之文席
善有微其必納兮言安往而不擇覩帝衷之嘉悅兮承
髣髴乎霽顏瑞靄鬱其迴薄兮寶饌綺錯而崇頌粵稽
帝王之迭興兮莫不履大而圖艱執一中以相授受兮
猶惜陰而罔間昧爽不暇少息兮望道每切夫未見佩
丹書而宴安是屏兮命交修其靡倦簡冊昭然可慕兮

歷世滋久而璀璨往者不可與為伍兮每遙覽而增歎
踵前修以作則兮流曠古之希聲講筵歲以軒揭兮邈
大道而迅征六經配若行地兮匹日月以離明十萬億而
未有既兮人文朗耀而永萃乎休禎敢作頌曰穆穆
天子兮照臨萬方皇極茂建兮位躋元良日新厥德兮
夙夜靡遑儒臣燦列兮禁夜翱翔論道密勿兮共贊雍
熙責難陳善兮有赫其儀惟帝是俞兮龍光陸離元命
聿臻兮萬禩為期

經筵賦

明 沈一貫

於鑠帝命睠茲皇明苞寰區而握昌符歷重熙而享昇
平明明我后應時載靈既虛已而執契復垂文而穆清
惕寶器之重委儼馭朽之危情眷求治安象天健行考
辟雍之舊典流闕宮之嘉聲受四方之圖籍來八荒於
王庭然猶歎其未聖慙謂若傷托羣后以渺渺涖巨瀛
之茫茫虛襟下問謙讓未遑疇可以俾予一人庶幾哉
寵之四方於是大宗伯進曰臣聞至治無極非天地所

昭至道無息惟聖學所包是以學戒居諸道在芻蕘炎
帝啓聖於悉諸軒皇藉覽於大撓顓頊降誠於夷父高
辛隆禮於伯招放勳明德於伊壽重華舍己於箕由廣
成顯而妣德昌伊摯尊而一統遙緝熙止而文命新丹
書戒而武功高格天則帝鑒朗施民則皇需饒大哉聖
哲垂萬世於竹帛實云厥惟可徵若乃漢帝表章張孔
李桓貢其忠唐皇廷禮徐賀褚馬獻其程濟濟儒紳鳴
佩於天祿石渠典冊之府初初俊髦捐讓於承明金馬

著作之庭莫不推校圖祕裨益睿明至於奎麗緯而闡
曜奭舉賢而翌聖僚有說書殿以宗政游暇日以典墳
動至尊之觀聽此亦一代之偉制千載之良鏡也魏巍
聖祖穆穆性靈體天合照則地立極神矚不慮而遍舉
徽猷默運而崇勒然且投戈講藝崇儒創則羅名生弋
鴻容該古文誦曩冊文華御而聖訓廣白虎講而睿學
殖雖無資於溟岱豈捐棄乎塵滴是時也學無常師講
無定式惟暇日之是競雖夙夜而靡息迺我英廟著為

定儀睽彼文華爰祕鷹輿陳甲觀之琬琰表河洛之圖書備典該聖選禮崇儒聖聖相承鏗鈞舒徐故累葉仍懿於無疆而重光起燭於乾曦亶人主之至樂亦王道之永圖宜率舊章用昭皇熙於是天子改容燦然色笑敷禮卿以儀陳命羲和以吉告帝幕霄懸瑤宮夙埽淨几張而織塵絕寶冊函而榮光耀稟述作之徵明極儒紳之妙選是日也天子乃冠翊善之冠衣袞龍之衣辨色而視朝向明而聽治敷奏既終升輿執綏方明前導

昌寓後隨紛龍鳳之羽蓋揚日月之文旂徹鐘鼓而不
御斥廣樂而無移首經幃而徑邁躡蓬山之依稀嘉雲
藹乎其回旋聖容穆焉其熹微堯趨舜步禹驟湯馳爰
升法座撫南面而緜縞時三后八蕃鏘集容與而交進
羣工庶尹委蛇雜遝而旁趨金貂玉珥虎賁郎將之官
魚麗而雁行麗正集賢道術博聞之士麟遊而鳳儀前
則柱後惠文象簡而霜列後則閣尹閣寺銀鐺而雲逸
於是司儀贊拜臚卿唱起登降肅穆詘折蹌濟紅雲捧

而黼展尊條風披而簾攏美瑞香凝霧而糾紛瑤席射
日而戢音左史捧瓊編而敬展則星辰燦而玄紀彰右
史擘牙籤而進讀遂琳琅傾而大寶理天聽竦而羣喙
息聖輿呈而千載啓鴻碩展生平之懷齋戒出夙夜之
貯訓六經談衆史氣諧八音聲中六呂敦崇哲業展眎
宏軌書標七觀詩列四始五經正戴氏之劔十翼張孔
門之炬洞性靈之奧突極鄒魯之骨髓神何由降明何
由示帝有所成王有所主黃虞興而慶珍來顧景承其

奚以辛癸起而繁祉集方做擾之安始豈非以欽聖者
納祐之門昏迷為斂肯之止惟典學以始終實聖皇之
砥礪日出王與游行惟昊天以求似反覆乎治亂興亡
之道危微乎邪正淑慝之旨或正詞以標義或微言以
示委或據古以刺今或即表而商裏黜百氏而不談曾
蕪詞之足取道詭聖經者雖顯而必略言資世用者無
纖而不舉蹤晉漢之統批唐宋之序雖委瑣不足稱而
殷鑒之伊邇清言朗而宏墀應芳潤激而太液瀰腴詞

薦而膏味忘逸響流而樂音鄙雖斯須之入告洞千帝
之隆侈拾微言於已缺播王道於將始於是帝慮岑寂
灑灑洋洋聖躬靡斂顛顛昂昂蒼然視於無形渙然若
有所當儲精瞻慮淪聰疏明耳極重淵之厚目徹九顯
之蒼晰治亂之異眇聖賢之所藏洞人鬼之奧旨達
禮樂之微芒乃眷弘謨豫懌不忘詔大官以錫膳命酒
人以羅漿出納帑之文幣徵司農之珍藏庭實千品醴
酒數行度功而予計爵而觴昭慈惠之燕衍誦既醉之

遺章羣臣歡呼於闕下咸嘆聖學之重光而陛下方宵
然深維惕然靡遑蓋曰時者難得而易失學者難成而
易荒道者難合而易離心者難操而易亡并不以九仞
而及泉山不以一篲而成岡故時敏訓於伊衡而日新
銘於成湯余乃今知學之有益而將日務於自強也簡
緝儀斥煩文寒暑靡間以求多聞推甲乙之帳汰瑰麗
之陳恩加於蠓飛蠕動含生之類情洽乎冰天桂海橫
目之倫念躬行之惟艱待黎旭之初分庶乎既臚糾虔

彌親治典玉燭和命彤策書新此聖王貴學文之大都
所以超駕於皇羣也豈比夫辟雍明堂徒侈觀於園水
品朱繪紫僅撫掌於凌雲者而已哉臣躬邁熙會待詔
金馬之門敢獻頌曰於皇惟烈文同軌通愛茲暇日昭
德懋功敷讚聖業推揚帝鴻玄黃噴薄混元空伺網羅
上下彌遐弗同備茲鴻典漸陶素悰傾心碩彥矢謨虛
聰抑詭拔正撫絕揚豐學古有獲時惟乃雍選文定篇
原本要終一日一周配登寰穹搞神理性飭躬正容棄

彼姦媮遂除童蒙惟危惟微允執厥中有丕者基皇
王並隆日新又新永垂無窮

經筵賦

明
陳于陛

天子纘洪休開大明幹皇綱於湯穆翼帝載於登闕瑤
圖鞏固玉衡正平蓋受命者三載而淳化郁如也然猶
覃精古典問學莘莘邁殷宗之遜敏軼周后之緝熙仰
聖詰而作範尊道德以為師於是青陽仲月和日舒遲
式憲天度誕啓經帷遂命有司采吉日協靈辰羣寮夙

戒儀節備陳觀夫文華之秘殿也隆崇律率博敞嶙峋
映黃道之奕煜象紫宮之威神楯楹嬋娟而纏屬芬檫
蚴蟉而高驟釳砌青熒而布彩璇題潢澗而浮光飾髹
彤於文棟列珠璧於華璫金爵高棲於天闕玉虬天矯
乎仙梁其中則張黼辰啟瓊筵環以繡幄布以細旃衆
色之絢耀乎几案者若雲霞紛錯而鸞鳳翩翩也其上
則圖史經籍節比綸連牙籤皓瑩乎錦帙芸香勃鬱乎
瑤編覽謨訓之照爛於竹帛者若河海行地而日星麗

天也其下則玉爐峙立吐洩瑞煙高拂羽蓋芬芳欲然

又若霧氣煙煜煜藹藹平傍斗柄以迴旋也時則天子臨

皇極渙風雷鐘聲既徹閭闔弘開肅九重之儀衛紛百

辟以趨陪及夫會朝既畢迺駕鸞輅飾鳳帷右白虎左

蒼螭耀翠華翳靈芝玉鸞從風而鏗鈞金根映日以陸

離曳輕霞之寶扇懸皓月之珠旗揭豹尾之長竿靡魚

鬚之短旒控馴駟以前導獨騰踏乎晴颺執雙蓋以交

錯又彷彿青雲之下垂亦有文武之大僚侍從論思總

總搏搏先後委蛇若辰居所而星拱日行天而雲隨至
於陸衛千羣夾乎兩傍或繫雕弓或帶勁箭或秉玉戚
或持干將縱橫轆轤其聲鏘鏘淫淫與與歛馳而霧湧
者抑又不可勝數矣於是遵天衢度靈橋趨貝闕駐瑤
宮金鋪掩曖玉戶玲瓏排寶闥以直入撫錦席而嚴崇
擁九霄之華蓋覩五位之飛龍帝顏溫恭而晬穆仙闈
烏奕而鬱蔥冕旒煜其前垂神光發乎重瞳雖黻纁之
塞耳曾不蔽於聖聰巍巍皇儀炳炳帝容凡踵武天廷

者孰不精白而明雍故其左則論道之三公佐治之九
卿帶玉懸牙莪弁振纓鷓排鵠植濟濟崢嶸其右則貴
戚之勳碩侍衛之虎臣貂蟬錦衣劔珮章身魚鱗雜列
耀乎楓宸其前有諫議大夫簪筆柱史過失咸規言動
悉紀其後有閤尹閤寺禁掖之羣玉節金麾扈翊惟勤
其旁有熊羆赳赳賁育之倫其立如山其威如神於斯
時也金鋪色麗玉漏聲遲仙掌兮露凝觚稜兮日移鮮
雲宛轉兮廣廈和風駘蕩兮果愚近天上之奎壁隔人

間之塵縑禁垣密覲獻納亶宜迺有玉堂之士步履舒
徐屏息案前拂拭圖書然後講臣拱立佩服襜如覲天
光於咫尺腹心披而情素攄於是通諷諭極揄揚闡繹
文辭啓發篇章英華沈浮鴻藻張皇或宗禹範或贊羲
圖或窮墳索或述典謨或詠歎雅頌之遺或恢崇禮樂
之途采六籍之奧渺漱百家之芳腴鏡上古之粹精埽
末世之荒蕪極天人之變化綜治亂之徵符大者包乎
區宇小者潛於黍銖高者踰乎蒼蓋卑者徹於黃壚考

文則遠無不致說理則深無不鉤既推隱以之顯復因源以溯流始紛綸而浩汗終異慮而同謀論雅馴而彬蔚詞朗暢以優游講誦既畢迺再拜稽首退就其位天子則泊乎無營澹乎自持淵然凝慮而息想穆然研精而儲思繹仁義之要指侔神明而與為資即其端拱於大庭廣衆之上而培息於螭螭蝓蠖之中殆恍焉有悟於微辭蓋將推行為政治道惟馨建配天之茂烈敷長世之上經昭美化之洪苞恢景運之炎精亶文經而武

緯亦玉振而金聲提機挈會躋世昇平使龍沙燭耀而
畏震鯨波屏息而晏安海內恬然志捐心搏延光來世
榮號不刊享神靈之永祐集華夏之至懽豈徒蒐羅乎
禮園補苴乎書圃婆娑文字之林翱翔章句之府者哉
蓋聞聖性雖明不啓不廣臣心雖忠不引不盡故唐虞
賡歌三代獻納其時則皋益昌言於殿陸傳說託契於
舟霖君爽以卷阿矢訓周旦以無逸格心遐乎休哉不
可及矣若乃石渠甘露麒麟白虎弘文擬勝集於瀛洲

崇政侈縟儀而誇詡所謂言諄聽藐曾何裨補疇若聖
朝典章周備君臣都俞孚心合意眇古昔而論美惟五
三為足儷卓卓乎豈非帝皇之令節邦國之盛事歟至
夫經幄儀成鑿輿載旋天子嘉念羣臣之勞爰詔光祿
寵以御筵乃列金罍陳瑤觴珍饌錯列甘旨芳香於是
皇恩洽羣臣和樂意蒸醉顏酡凡師師有事者莫不宣
暢而自得踴躍而頌歌歌曰於惟聖明纂膺洪業撫八
荒兮憲章天行日新厥德宣重光兮經緯洞開左圖右

書爛縹緗兮勸誦雍容金和玉潤嘉謨彰兮啓沃帝聰
經綸攸責臻平康兮皇猷黼黻泰階穆如滋靈昌兮再
歌曰君明兮臣良雲龍相從兮萃一堂增岱宗兮寸壤
補龍衮兮七裏惟木從繩兮斯直如魚縱壑兮洋洋元
首股肱兮綢繆傳祚奕葉兮無疆

經筵賦

明
李維楨

天子即位之三載闡坤珍握乾符狹三王之趨起軼五
帝以長驅輝烈炳曷延及八區蓋遐往之眇覩載籍未

易書也然猶退然若蒙冲然若虛訪廣成於至道問大
隗之幽居多聞聿求大道是循陶化染學非言厚行孕
虞育夏陶周甄殷仰瞻帝序月惟仲春煥明詔則玄昊
涓吉日協靈辰命有司其展物將納誨於儒臣啓文華
之秘殿飾儀節之繽紛爾乃觀其結構巍巍奕奕殖殖
洋洋錯楚撩以相接抗應龍之虹梁列鬆彤之繡栢垂
琬琰之文璫琳珉清熒而爛彩穀組颯纒而流光岌乎
若崇山岑嶺以嶮齶煥乎若華蟲舒翥以高翔其中則

有黻筵丹宸瑣席畫純細旃綺幄寶几文茵其上則有
金版玉匱細帙縹囊牙籤雕篆竹素芸香其下則有薰
爐石獸青氣煙煜委灰郁烈蕙馥蘭芬於是天子方開
閭闔運衡鈞受四海之冊錄膺萬國之貢琛藹藹軒冕
濟濟搢紳會同有繹夙夜惟寅既究皇儀既展帝容臚
卿致告朝禮攸終乃駕鸞輅時乘六龍翳靈芝之旖旎
揭鳳蓋之龍從金根炯晃以映日九旂排旆其從風控
飛黃以前導鳴和鸞之雖雖八座之彥兩階之僚後先

陪從肅肅陶陶期門禁卒陸戟百重縣獻植鍛魚甲駢
弓清塵警蹕翊護王躬儼儼留霍夫孰得而窮也於是
遵大路歷皇衢涉雲橋步玉除趨瑤闕駐仙輿黼座孔
安垂袞璜琚平平左右趨進翼如畫省列卿黃閣三公
拖朱紆紫佩印圍琮赫赫臣鄰鷺序其東勳戚世胄祚
土分圭金吾郎將秉鉞揚鉞矯矯虎臣羽衛其西栢府
烏臺之吏絳衣青瑣之賢珥筆持橐鵠峙於前永巷掖
庭之職銀璫左貂之秀擁劍擎戈蟬聯於後亦有賁育

之倫膂力方剛如熊如羆萬夫莫當朱威長干山立其
傍於斯時也日華承露之掌風動萬年之枝龍顏豫而
香煙裊綵雲捧而雉尾移奎壁燦西崑之岫文章煜太
一之司儼九天之寥廓隔塵宇之喧卑論思啓沃茲惟
其時迺有金馬玉堂之士麟閣雲臺之英手方冊以拂
拭退跼躅而屏營然後講臣就列獻曝將芹披往牒誦
遺文元元本本殫見攄聞義兼諷諭辭極揄揚冰釋泉
湧玉振金相陳典謨於二帝稽述作於素王繹丘索則

天人之蘊悉論禮樂則中和之道張談訓誥則政事之
體備咏雅頌則性情之德彰剖析毫釐擘肌分理推前
藻而等采沛詞源而未已至於編年之籍紀事之書列
世代之終始著理亂之徵符罔不宣其奧要漱其芳腴
六經既索百氏旁通鈞深致遠考衷度中下者徹黃泉
高者極蒼穹大者括宇宙細者比蟻封匪陳言之捃摭
冀少裨於君聰再拜稽首踧踖復位天子於是穆然思
默然識因文見道覃精涖治嘉侍從之勤勞洽需雲之

燕惠班玉觴列金卮炙魚夥清醑致皇仁溥洪德施旋
軫乾清葆攝元真藏用無為顯仁翌明招忠直之士開
公正之路捐不急之官省非作之務絕流遁之繁禮歸
民情於太素覆露蒼蒼亦禔福羣生晷緯昭應山瀆效靈
露甘泉醴麟遊鳳鳴器車呈於嶽麓朱草豐於中庭武
義烜赫於有截仁聞馭水乎無疆豈無翔翔章句之府
容與翰墨之場侈賓僚之聚會飭儀衛於張皇可與並
日而談度廣而絜長者哉頌曰明明我后作之君師茂

緒光昭三載於斯皇情眷眷不敢怠違緝熙宥密日就
月將秩秩經帷啓自禁垣帝庸戾止集彼羣賢以資忠
益以新峻德允迪前徽潤色鴻業燭幽開泰協極陵風
薄海安瀾比屋可封猗歟醇粹聿懷多福用告來禩茲
馬式穀

經筵賦

明

于慎行

皇帝嗣基御宇奉一德叶三靈建皇極合天中埽地肅
乎泰時園橋煜乎學宮橐軒弧於塞障舞舜戚於階庭

玉馬金牛表清明之上瑞龍庭鮫室沾覆露之鴻功既
以光神聖之大統登三五之遐風而猶冥搜乎乾乾翼
翼勤思乎赫赫明明凝神日中之戒游心千古之英乃
詔司存命掌故蒐衢室之遺文究石渠之架度綜英廟
之遺謨接五宗之高步馳轅禮法之場按轡皇王之路
探蓬觀之圖書發雲臺之緗素儒衣禮席掄故老之儀
形玉檢琅函貯將軍之武庫寶幄陳乎邇英法筵肅乎
護籙爰宵衣而涖止益輟朝而展輅爾乃九衢霧斂雙

闕霞光萬國會塗山之玉百靈侍軒后之堂翊文戟於
高殿震鐘鼓於巖廊覩中天之廣座方穆穆以垂裳開
閭闔而敷奏紛籲帝之琅琅九賓之儀既序百官之職
孔明帝慨焉而四顧思問道乎總章遂乃轉金根響雲
蹕道容容之羽旂啓森森之柎陛徑會極之通門憩文
華之秘室瑤芳布乎蘭祀明月輝乎椒壁伊彫几之前
陳覩黻屨之中出尚衣陳席司儀贊揖元公秉圭徹侯
奉璧四輔雍雍九官秩秩或插侍中之貂或列期門之

戟或聳柱後之冠或珥殿中之筆劔珮陸離冠裳赫奕
莫不鵠立廣建屬耳乎皇王之迹於是惇誨之博博碩
之儒出夔龍之高列懷旦說之嘉謨振赤芟之灼爍步
金烏而前趨瞻皇軒而拜手委長佩之瓊琚走鳳掖黿
禁之彥奉赤文綠字之圖秘藪芳乎帙氣栢燠起乎文
厨於是雞香微動錦軸輕舒覈玄玄之妙義闡洋洋之
聖謨既笙簧乎墳典亦鼓吹乎圖書帝驟王馳六藝之
文郁若周情孔思一統之說昭如若乃授簡載筆之紀

連雲委閣之儲或翼翼小心而鴻名無斁或涓涓不塞
而狂瀾競徂羌一一而抽衍冀儆戒於無虞於是天子
超然玄覽朗然遐覩冥探五際潛游三古傾道藝之芳
華憩文章之林府喟上聖之遐風想哲王之高矩抵舜
壁於巖谷投隋珠於合浦朝陳告善之旌庭設乞言之
鼓運玉燭之光明視八埏於庭戶於是呼中使命大官
醜挂醕傳玉盤哲傳元老依几登筵鳴玉而下鏘鏘珊
珊晞湛露而鴻恩溥奏鈞天而廣樂驩陋石渠於往錄

展東觀於前編願緝熙之無斁保隆稱於萬年重曰於
昭維皇崇至德兮鉅典煌煌猷赫赫兮措軌堯階步舜
室兮吹萬亭毒登皇極兮聿駿有聲與天萬億兮

經筵賦

明沈位

皇上即位之三載道浹政治風穆恩洋貢楛矢於肅慎
降釐祉於九陽導先軌以繼作宣列聖之重光書傳所
載莫得而揚然而聖人抑畏不遑寧處聿求多聞惟善
是主尊道藝登三五與治鑒亡宗約卑侈曠旌門而弗

居瞻文華以容與文華殿者負層城之幽邃歷巖廊之
杈柯連金馬石渠以齒列應西崑東壁而肩差豐麗駭
觀帶景流霞文書史策聖詰英華六經四子九流百家
丹鉛縹緗光起雲霞蓋典籍之在茲豈徒崔嵬與谿衍
迺命禮官迺援故典卜良辰以講藝極儒紳之妙選略
審美而若虛忘芻蕘之駢淺矧茲地之為勝可以綴學
而展卷於是大宗伯等合辭而進曰日之在奎皇御法
筵載在方策先朝相沿率由舊章庶幾不愆言帝曰俞哉

執事惟虔於是仲春丙戌朝陽登曦集冠珮向明治畢
朝會忘媠娛備法從乘龍車稱啟蹕揚雲旂望東觀以
來臨駐翠蓋之萋萋當是時也閭闔排魚鱗啓和鸞寂
皇輿止鵠立乎右者金貂貴戚虎賁郎將之官鷲序乎
左者惠和承明修潔博習之士前則給事黃門惠文柱
史後則中涓攜僕閣尹閣寺又有司儀辨等狄人設席
天子迺坐繡幄而羣公受命以登城沛艾容與揖讓徐
疾魚魚雅雅濟濟習習盛三雍之上儀儼天顏於咫尺

香靄苑其凝霧蘭芷為之生色然後典司肅事文几既
陳賜以清燕之間假以虛聽之誠碩儒彥士敷納經綸
文學端書講臣啟心或揚權乎洙泗鄒魯或考究乎訓
誥典墳或因經而論理亂或執史而陳替興或激烈而
侃侃或諷諭而閤閤叙帝王之宏休見羹牆於遺文百
氏略而不談議論一本之六經開闔大訓闡揭天人音
朗暢而盈耳義徽懿而足聽擘肌分理殫見達聞抽演
微言以洩道真上下情通麗藻彬彬左右論思鱗次敷

陳翕繳純繹恍如張樂平洞庭惟師臣之為帝笑秦皇
以衡程雖納誨之須臾固已上下夫古今欲說未終天
子稱善命大官而具羞賜諸寮以飫宴芳醴浮琥珀之
光蕙肴脩燔炙之薦終式燕之令儀咸酤斂而歡忭於
是輦駕返旌還乎法宮穆然俛而深惟遊神邁夫遐風
抵壁投珠詢道求中放鄭遠佞畏命悲窮聽言用能馳
明飛聰薄賦斂而慎刑罰躋玄湯而樂時雍昔堯師州
父百工允釐舜學許由庶績乃熙高宗以傳說仰德成

王以姬旦無為以今揆之信先登茲蓋學古之有獲匪
壯觀於威儀者也臣敢為之頌曰於鑠維皇天啓詰兮
不自滿假揚文烈兮儒紳侍經潤鴻業兮乾乾緝熙遺
眊眊兮誰其配之成訪落兮明德惟馨臣有光兮休哉
懋哉裕無疆兮

經筵賦

明
李長春

猗皇上之受命兮承千葉之丕圖撫寓縣以端拱兮體
列聖之訏謨恢皇綱於紫闥廓帝紘於黃樞德澤遍乎

朝野歌頌溢乎壤衢爾乃慕冥風於往代懷希蹤於都
俞思以潤色鴻業遵軌聖塗於是排閭闔開蓬壺登耆
碩招鉅儒布几筵而論道張帷幄而談經懋緝熙於學
問藉啓沃於典刑蓋舉洪猷之久曠標謨烈於日新者
也方其朝陽未啓夕漏猶存佳氣浮於禁籞祥光燦於
紫宸鳴珂絳闕聽鑰天閣亦有東觀宿儒北門新輔抱
恭默以潛思儼天威於九五遲講席之弘開披肝膈而
一吐迨夫瞻冕旒兮螭陸飄環珮兮鳳墀夔龍紛沓而

接武鸛鴻絳繅而來儀當拜舞之既畢見碧落之晨曦
天子乃駕雲車抗虹旌下玉階而宛轉沿鈿砌而從橫
翠華導以虎綴丹轂翼以貂璫揚揚焉瑤瑤焉戾止乎
文華之廷於是黼座既設繡衮載臨端揆趨蹌而鵠侍
百僚環拱而星森晞紫微之清切賤黃閣之崇深天顏
藹乎春煦萬籟喩於無音爰披圖而按帙遂揚權夫古
今遡堯舜典謨之美尋三代彝則之英若乃盱衡掉舌
啓口容聲瞻聽靡貳誦說鏗鏗或元元而本本或探隱

而抉微托箴規於可否含諷諫於是非疊疊乎昌明微
滅之旨諄諄乎安危倚伏之機固盟心而自審雖逆耳
而莫違爾乃仰觀天子高拱淵默游神太虛聽言斯憚
厥意與與嘉聖謨之既闡嗟皇極之無頗咨論思於朝
夕願比玉於琢磨羣臣拜手以稽首祇承休命而賡歌
乃需需命洽泰交紛承恩於鎬宴恍覲德於虞膠於焉
垂紳委佩退食自朝蓋初日已收其煒煜而午風澌澌
其飄飄豈比夫石渠白虎較同異於訓詁者可共貫而

同條哉臣適待詔金馬之署聞學士大夫談茲盛鉅也
敢作頌曰於休天子離照萬方懋哉聖學天行自強咨
我儒碩左右贊襄式脩彝典德音孔彰諗茲治本邦基
以昌綸綍不息其道大光尚疾敬德作我哲王

辟雍鄉飲酒賦

晉傅玄

時皇帝親枉萬乘之尊號以幸乎辟雍鹵簿齊列官正
其容乃延卿士乃命王公定小會之常儀兮饗殊俗而
見遠邦揖讓而升有主有賓禮雖舊制其教唯新若其

俎豆有數威儀翼翼賓主百拜貴賤修敎酒清而不飲
肴乾而不食及至嘒嘒笙磬喤喤鐘鼓琴瑟安歌德音
有敎樂而不淫好樸尚古四坐先迷而後悟然後知禮
教之弘普也

鄉飲賦

唐
闕名

鄉飲之制本於酒食形於樽俎和其長幼洽其宴語象
以陰陽重以賓旅此六體者禮之大序至如高館初啓
長筵初肆衆賓便仙而入門主人稽首而再至則三揖

以成禮三讓以就位貴賤不共其班少長各以其次然後者粟具設酒醴畢備鞀鼓遞奏工歌咸萃以德自持終無至醉夫觀其拜迎拜送則人知其潔敬察其尊賢尚齒則我欲其無競君若好之實曰邦家之慶士能勤之必著鄉曲之行今國家徵孝秀辟賢良則必設鄉飲之禮歌鹿鳴之章故其事可得而詳立賓立主或陞或堂列豆舉爵鼓瑟吹簧動而敬居則莊百拜乃畢用賓於王禮主於敬樂主於同明士苟習於禮樂則可招貴

於旌弓庶其緝熙聖迹宣暢皇風豈徒務燕謔而湛樂之是崇

大酺賦

有序

宋

劉

筠

臣謹按前志酺之言布也王德布於天下而合聚飲食焉肇自炎漢初興日不暇給罰其合醪之會著於三尺之法逮乎孝文崇修禮義賜酺之惠由是流行况我朝盛德形容汪洋圖牒固不可以寸毫尺素孟浪而稱也臣今所賦者但述海內豐盛兆庶歡康為負暄獻芹之

比爾其辭曰

聖宋紹休兮三葉重光祥符薦祉兮萬壽無疆昭景貺
於紀元之號還淳風於建德之鄉慶無邈而不被俗無
細而不康乃下明詔申舊章賜大酺之五日洽歡心於
庶邦爾乃京邑翼翼四方是則通衢十二兮砥平廣路
三條兮繩直固不以列肆千里集民萬億羣有司而先
置戒掌次而具飭幕九張兮燦若舒霞廊千步兮軒如
布翼外饗之百品有敘酒正之六物不忒分命司市遷

闐闐於東西鳩集梓人枝輪輿於南北將以極瑰竒詭
異之歡示深慈至惠之澤也於是二月初吉春日載陽
皇帝乃乘步輦出披香排飛闈歷未央御南瑞之嶢闕
臨迴望之廣場百戲備萬樂張仙車九九而並駑樓船
兩兩而相當昭其瑞也則銀甕丹甌象其武也則青翰
餘腥聲砰磕兮非雷而震勢憑凌兮弗葦而航且觀夫
魚龍曼衍鹿馬騰驤長蛇白象麒麟鳳凰吞刀璀璨吐
火焚煌或叱石而成羊文豹左架兮右攫玄珠倏耀兮

忽藏畫地而川流沔沔移山而列岫蔣蔣神木垂實靈
草擢芒髮髻而豆獸綽約天倡曳綃紈而綵縵振環珮兮
鏗鏘赤刀受黃公之祝大面體蘭陵之王木女發機於
曲逆鳥言流俗於冶長千變萬化紛紜頡頏前者拗怒
而欲息後者技癢而激昂舞以七盤之妍袖間以九部
之清商彈箏擗箏吹竽鼓簧南音變楚隴遠明羌琵琶
出於胡部摻鼓發於彌狂方響遺銅磬之韻羯鼓鬪山
花之芳壘篴之妙引初畢茄管之新聲更揚洞簫參差

今上處燕筑慷慨今在旁琴瑟合奏而奚辨埙箎相須
而靡遑信滿阮而滿谷豈止乎洋洋盈耳而已哉又若
撞未之技趨捷之徒籍其名於樂府世其業於都盧竿
險百尺力雄十夫望仙盤於雲際視高絙於坦途俊軼
鷹隼巧過猿狙術多能於懸絕技從命於錙銖左迴右
轉既亟只且嘈噴沸瀆鼓譟歛歛突倒投而將墜旋斂
態而自如亦有佞僮赤子提攜叫呼脫去襁褓負集危
軀效山夔之躑躅恃一足而有餘歛對舞於索山跳九

劍而爭趨偃仰拜起如禮之拘雜以拔距投石衝狹戲
車蛇矛交擊猿騎分驅韓嫣之金丸疊中孟光之石臼
凌虛習五案者於斯盡矣透三峽者何以加諸復有俳
優旃孟滑稽淳于詼諧方朔調笑酒胡縱橫謔浪突梯
囁嚅混妍醜於戚施變舒慘於蘧條乃至角抵蹴鞠分
朋列族其勝也氣若雄虹其敗也形如槁木誰謂乎狼
子野心而熊羆可優誰謂乎以強凌弱而貓鼠同育斯
固藝之下者亦可以娛情而悅目是時也都人士女農

商工賈鱗萃乎九達之衢星拱乎兩觀之下舉袂兮連
帷揮汗兮霈雨鈿車金勒雜遝而晶熒袷服靚裝藻緝
而容與網利者罷登壟斷力田者競辭畎畝屠羊說或
慕功名斲輪扁亦忘規矩寂寂兮巷無居人憧憧兮觀
者如堵以邀以遊爰笑爰語始乃抃舞於康莊終乃含
歌於搏俎旁有相如滌器濁氏賣脯乘時射利鬻良雜
苦勺藥之味蚘蝮盡取既賈用以兼贏咸滿志而自許
又乃百工居肆衆貨叢聚錦繡之設皎朗薨廡競相尚

以奢麗羌難得而覲縷於以見國家蕃富上下充足女
有餘絲男有餘粟顧金土兮同價興禮讓兮郁郁若夫
七相茂族四姓良家蟬聯鼎盛照耀繁華皆結駟而連
騎雖兩漢其寧加則又有菟裘老臣逍遙高尚乘下澤
之車曳靈壽之杖爰稽首於堯雲挹衢樽而無量鄉里
俊造草澤英才覽德輝而狎至觀國光而聿來顧鼎食
之可取豈直野草之謂哉羽林戴鷩之夫期門伏飛之
子罷羽獵於長楊投賓壺於棘矢襲楚楚之衣裳喜交

臂於塵里大矣哉惟堯舜之作主兮盛德日新矧臯夔
之為佐兮嘉猷矢陳奏君臣相悅之樂會比屋可封之
民湛露未晞在藻之歡允洽太牢如享登臺之衆咸臻
老吾老以幼吾之幼不獨子其子而親其親鰥寡孤惻
兮各有所養蠻夷戎狄兮孰非我臣粟帛之賜已厚牛
酒之給仍均春醴惟醇炮炙薌芬皤髮者駕肩而洩洩
支離者攘臂而欣欣莫不合和而吐氣蹈德而咏仁一
之二之日樂且有儀三之四之日不醉無歸五日兮饜

飫斯極但見夫含哺而嬉介爾眉壽和爾天倪非夫上
聖之乾乾致治其孰能逸豫而融怡者哉敢為系曰於
鑠我宋巍乎帝先創業垂統靜直動專威烈既茂文德
是宣謙而不宰讓之於天上帝允答靈貺昭然厥慶惟
大庶民賴焉爰錫醑飲流惠周旋有殽如阜有酒如川
既醉既飽無黨無偏體安舒兮被堯日氣和樂兮暢薰
絃祝聖祚兮揚純懿永延長兮彌億年

飲耐用禮樂賦

明

趙東曦

若夫祝融司令中呂諧聲其帝炎帝其日丙丁蚯蚓乍
出螻蛄初鳴麥秋已至蠶事告成先期則太史有火德
之請立夏則百爾侍南郊之迎維時天子居明堂左个
乘朱路駕赤駟贊桀俊封諸侯固已爵祿之遍及而慶
賜之畢周天子曰予實不穀仰荷天休宮廷清宴泮奭
優游甸采要荒小球大球三牲魚腊四海九州丹漆絲
纊中廟用羞維爾卿士爰咨爰謀股肱腹心黼黻勳猷
攬名山與大川兮歷千載而悠悠慨興亡於往代兮恒

宵旰之是憂夫既制海內而子元元今詎忘締造之綱
繆念艱難於民力今景世德以作求幸馴致乎太平兮
敢以遨而以遊然而咨傲者所以嚴君臣之分也樂愷
者所以通上下之情也爰有酎焉一朝饗之今夫酎之
為義大矣釀之於春乘陽氣也飲之於夏順天時也餽
芬穠郁邦家光也元氣滋培秫稻齊也厭厭夜飲明良
慶也濃濃零露膏澤施也而且陶器必良湛熾必潔監
之大酋几筵肆設蹠躋彤廷輝煌鳳闕飄風南來冰壺

澄澈雲浮空而鬣鬣山削立而巖嶮披綠樹之濃陰覺
光天之可悅聽和鸞兮雖雖儼龍光兮相接油油乎笑
語之溫欸欸乎情悃之決挹黃流於玉瓚兮緬休風於
曩哲自泰交之不再兮嗟堂廉之濶絕處深宮而親便
嬖兮遺賢士而弗屑誦蓼蕭湛露而太息兮仰人主之
盛節孰意逢茲良會兮駕唐虞而比烈非時和而年豐
兮何泉香而酒冽彼夫垂諸故府厥惟大禮職諸太師
厥惟大樂王者治定功成代有制作用以娛賓式燕以

樂維天尊而地卑兮乃成象而成形萬物散殊於兩間
兮合動靜小大而禮行既貴賤之定位兮亦類聚而羣
分先王知安燕之易至於亂兮主賓百拜而有常經矧
堂陛之森嚴兮曷不穆穆而明明彼陰陽之相摩蕩兮
煖日月而鼓雷霆氣化周流而不息兮春夏長養而物
生樂以著夫太始兮可格神鬼而衍嘉賓奮至德之光
華兮抑何廣大而清明配八風而從律兮協五色而成
文耳目因之以聰明兮血氣因之以和平爾乃歷金門

上玉堂立阼階秉圭璋具筐篚將玄黃昭德音示周行
簠簋俎豆制度文章升降進退佩玉鏗鏘峩峩翼翼濟
濟翔翔臣再拜而舉首君答拜而舉觴我心悅兮我心
寫酌言獻兮酌言嘗於是臣歌天保君咏鹿鳴堂上堂
下樂行倫清周還風雨鼓瑟吹笙淵淵鞀鼓嘒嘒管聲
羽籥干戚行列錯陳綴兆舒疾俯仰屈伸羞自東房洗
當東榮式飲式食既以中心一唱三嘆寧有遺音觀天
顏之有喜兮叨輦轂之趨陪拂清風以怡曠兮倚明月

以徘徊飲醇醪而不忍釋兮握玉笋與金罍燦庭燎之
輝光兮任銅漏之頻催當旨酒之在御兮復禮明而樂
備誠必易而必簡兮爰極天而蟠地有嘉德而無違心
兮君臣何有於猜忌彷彿乎颺拜之朝兮與賡歌之世
第見人心感動天下一家莊敬恭順中正無邪子諒易
直懿德柔嘉形為好惡不偏不乖蓋無體之禮在三千
三百之始無聲之樂為直廉嗶緩之階然後稽之度數
制之禮義以和其聲以道其志品節詳明剛柔並濟父

慈子孝兄良弟悌射御朝聘昏姻冠笄悉有常儀遵守
弗悖四時流行太和元氣刑罰不用兵革不試造化不
言而百物生聖人無為而天下治且夫一人作睹而卿
大夫效媚焉萬民樂利而邦家孔固焉天子固聯臣民
為一體者也若乃邊陲多警水旱兵戎曠野兇虎中澤
哀鴻違農時而咨怨繁力役而倥傯苔華遺痛於在留
大東致嘆於杼空焦勞宸慮况瘁清宮銅駝月冷金馬
雲封零落瀛洲之彥淒清禁苑之鐘或疆場以戮力或

四方以經營望長安而不見排閭闔以奚從靡不鞅掌
王事蹇蹇匪躬雖有經曲不過粉飾治平之具雖有金
石幾同桑間濮上之音欲於一堂之上杯酒逡巡而豈
可得邪今日者天心眷佑屢豐降祥東作方息西成在
望我黍稷千倉萬箱車書盟會玉帛冠裳烽煙盡掃
國祚苞桑龜龍假鳳凰翔膏露降醴泉芳器車美馬圖
良其禮固周官周禮之遺也其樂猶大章咸池之盛也
天子揚解而語曰民安物阜諸君子之功也五風十雨

農夫之慶也予一人何德之有諸臣卒爵而前曰我君
憂民之憂向者於元日祈穀親載耒耜嘗麥獻繭殷懷
備至時序清和國家無事曠古遭逢大君之賜微臣拜
手敢忘所自乎頌曰君子有酒多且旨兮饗帝饗親及
多士兮威儀秩秩維其美兮萬舞洋洋終復始兮勢分
兩忘胥樂只兮願我元后恤民瘼兮天監在茲生百穀
兮本固邦寧那居卜兮樽俎雍容以似續兮於斯萬年
介景福兮

奉制記樂賦

有序

明
夏言

嘉靖龍飛十有三禩歲在甲午仲夏癸巳晝漏下四十
五刻時加於未天子駕幸南宮御重華之殿乃遣中官
發宸翰愛雨後之新涼召五臣而來見時則太傅侯勛
策騎疾馳師保輔臣孚敬暨時冢宰宗伯鉉與臣俱攝
齊並趨鵠峙階墀少焉承命而入榻前屏息仰覲天容
望雲就日降顏霽威德音洋溢天子曰祀器新成陳諸
殿中爾往敬觀庶協予衷爰賜彩箋金鉸象飾與卿同

涼用滌炎熱既乃錫燕宮中霑醉而出是日上以聖躬
太康奉親承歡又君臣同遊對時育物為樂甚大明日
上有制曰事須有紀然必託諸吟句卿等宜各作一賦
命之曰奉制紀樂用紀厥事臣少保言列在春官兼領
學士謹頓首獻賦恭以應制賦曰

惟皇天之嘉惠兮協脩景之與良辰迺仲夏之炎赫兮
沛甘雨以清塵眺西山之羣岫兮挹爽氣於朱闈瞻南
宮之芳樹兮連清蔭於紫宸感皇衷之悅豫兮懷駿賞

以怡神法先王之茂對兮屬眷想乎臣鄰覩品彙之盛
長兮喜六合而同春暢宸襟於久靜兮洵萬福而來臻
於是稱警蹕以夙駕兮將戾止於東華朝問寢於東朝
兮奉聖母而同過出層城以南騫兮策天閑之玉騶百
神扈以景從兮驅祝融而導羲和紛神仙之行綴兮儼
雲擁而星羅聽黃鳥之間關兮思伐木以作歌念君臣
之疎隔兮曾日月而幾何召五臣以同遊兮嗣盛美於
卷阿已而陟翔鳳之巍巍兮攬九衢之歷歷睇欽天之

穹窿兮並追先之截業荷玄宰之錫祐兮賴洪庥於祖
烈翳翠華以西指兮望乾運之聳特躡玉梁之天矯兮
渺飛虹於千尺度翠巖之窈窕兮恍御風於八極坐嘉
樂之館兮納南薰於環碧乃若偃鳴鶴於喬松兮舞文
鸞於修竹采芳蘭於中沚兮擷芰荷於水曲苑花帶露
以含馨兮宮草滋煙而長綠跳錦鱗於方沼兮激飛泉
而斷續驟冲情以逸發兮神融融而興足會衆美之可
愛兮咸適耳而悅目善動植之得時兮藹生意其可掬

矧上下交而成泰兮敘天倫而介戩穀宜聖心之樂只
兮合乾坤之化育頌曰天鑒皇德福此萬國聖躬康兮
天眷慈極純嘏是錫聖孝彰兮於皇格天化日豐年恩
風翔兮南宮赫啟薰風薦爽雨霽涼兮龍旗至止鳳輿
戾只稱壽觴兮有文有武舜臣惟五奉清光兮茂對時
育羣品萬物則先王兮凝和萃精皇心載寧樂洋洋兮
泮渙優游百祿是道祐無疆兮祐無疆兮帝道昌兮億
萬斯年休有光兮

正月一日含元殿觀百獸率舞賦

唐鄭錫

皇上端拱穆清法春秋五始之要酌禮樂三代之英赫
帝典含元正衡紀允叶攝提為真疏龍首以抗殿靡魚
須而建旌開彤庭執玉帛者萬國發金奏韻簫韶而九
成祥風應律卿雲夾日華夷會同車書混一羽衛宿設
乘輿曉出陳八佾象鈞天之儀舞百獸備充庭之實彼
毛羣與羽族感盛德而呈質度曲既三薰風自南進旅
退旅兮猛志外戢擊石拊石兮和氣內含忽齊首以瞪

目乍脈脈而耽耽威而不猛樂而不諼搏鷲者搖尾而
就養剛狠者戢角於觸藩牝馬馴致於坤德羣龍利見
於乾元若乃大禮成壽觴薦天聲起皇威遍金石鏗鏘
以攢雜文物歲蕤以蔥蒨獸臣獻伎於廣庭樂正舉麾
於層殿怛荒戎於醜虜咸稽首而革面其初進也波委
星攢如崗如巒發揚蹈厲兮鼓舞爭集無大無小兮容
止可觀其少退也軍旋陣折匪蠻匪貊蹄角且干兮羽
儀累百詭色殊竒兮相輝赫赫豈獨九尾靈狐一角神

獸顧兔宵落麒麟夜鬪非熊非羆為猿為狢威鳳巢閣
騶虞在囿條支之犀黃支之殼而已其徒實繁厥狀非
一五靈嘉瑞百寶異質數不可盡之於詞名不可殫之
於筆莫不聞至樂而知感樂皇風以相率忽指顧於應
規亦迴旋而中律穆穆焉羌難得而備述則知樂之感
也深德之被也普彼禽獸之遇聖隨萬里而成覩至若
吳歆越吟荆豔楚舞徒惱埋於心耳安擬議於干羽曾
不充虞舜之帝圖列后夔之樂府辭曰鑠元會兮正王

度奏雲門兮歌大濩百獸舞兮四夷懼于胥樂兮皇風
布客有慕上古之賡歌望承明而獻賦

千秋節勤政樓下觀舞馬賦

以態有餘妍貌
無停趣為韻

唐錢起

惟大唐之握乾符聲諧六律化廣三無能使乘黃服阜
龍馬負圖必將登高率舞豈獨載馳載驅歲八月也一
聖之生千秋之首舉天慶丹陵之會率土獻南山之壽
上乃御層軒臨九有張葛天氏之樂醉陶唐氏之酒感

百獸之來儀即八駿之孔阜於是陳金石儼簪裾廣場
天近彩仗晴初有馭有驕有驛有魚雲聚日下花明露
餘帝曰司僕舞我騏驎可以敷張皇樂可以啓迪歡趣
須臾金鼓奏玉管傳忽兮龍踞愕爾鴻翻頓纓而電落
朱鬣驤首而星流白顛動容合雅度曲遺妍盡庶能於
意外期一顧於君前噴玉生風呈竒變態雖燕王市駿
骨貳師馳絕塞豈比夫舞皇衢娛聖代表吾君之善貸
向使垂耳長坂翹足遠坳天驥之才莫用鹽車之役不


停安得播天樂輝皇靈服御惟允簫韶是聽則知絕羣
稱德殊藝逸貌足之舞之莫匪聖人之教則陳力者願
驅策而是效

御定歷代賦彙卷五十二

謹案卷五十一第二頁前七行坻場染屨刊本坻
訛游據文選改

卷五十二第十六頁前四行度靈橋按橋字出韻
疑訛





總校官庶吉士 臣張能照
校對官編修 臣楊壽楠
謄錄監生 臣邵士洙